

Ekwo, E deru nù Ndu Híburu

Nchileke shi l'ònu Nwa iya kfu okfu

¹ Lẹ teke ọhazu bẹ Nchileke shi l'ụzọ, dụ iche iche zia ndu ekfuchiru iya nù; ẹphe ekfuru nù ndiche ayi phẹ ugbo olemole. ² Yọ be nta-a, buwa oge ikperazu-wa; yọ buru onye bụ Nwa iya b'o gude kfuru nù ayi. Ọ bụ l'ẹka Nwa iya ono b'o shi mee mgboko mgburumgburu. Yọ fọtakwaphu Nwa iya ono; sụ l'ọo ya bụ ishi k'iphemiphe ọbule. ³ Nwatibe iya ono egbu nwịnwii; shi ẹge ono ekoshi l'ọ bukwapu ẹge ono; bẹ Nchileke egbu nwịnwii. I -phụwa Nwatibe iya ono; b'ị phụwaru Nchileke. Okfu, Nwatibe iya ono kfuru ereshi ire ike. Yọ buru ire ono, okfu iya ere ono; b'o gude gudekota mgboko mgburumgburu. Ọ safutsuaru ndiphe iphe dụ ẹji, ẹphe meru; gbeshi je adugaru anọdu l'imigwe l'ẹka-utara Nchileke, bụ iya bụ onye kakọta ike.

Nwa ono ka ojozi-imigwe

⁴ Nwa ono bẹ Nchileke meru; yọ nyịbekota iphe bụ unwu ojozi-imigwe. Yọ bukwaruphu ẹge ono bẹ ẹpha, Nchileke guru iya, bụ iya bụ Nwa kẹ Nchileke kangokwaruphu ẹpha k'iphe bụ unwu ojozi-imigwe. ⁵ Lẹ Nchileke te nwekwa ojozi-imigwe ọphu ọ sụjeru:

“Ọ bụ nggu bụ Nwa iya;
tsube ntanu;
bẹ ya buakwa Nna ngu.”

Ọphu 'onwekwa ojozi-imigwe,
 ọ sũjeru:

“Ya a-bũru ngu Nna;
 nggũbedua abũru iya nwa.”

Ọ bũlekwaphu kẹ Jisọsu; bẹ Nchileke kfujeru
 ẹge ono. ⁶ Tẹmanu; teke Nchileke abya ọsu
 ọkpara iya ono t'ọ bata lẹ mgboko; b'ọ sũru:

“T'iphe bũ ụnwu-ojozi
 Nchileke l'ẹphe ha
 bajẹkwaru iya ẹja.”

⁷ A bya l'ẹka k'ụnwu ojozi-imigwe; bẹ iphe
 Nchileke kfuru bũ:

“Ya mewaru ụnwu
 ojozi-imigwe iya;
 ẹphe adugbaa l'ọ bũ
 phẹrephere; bũru ndu ozi,
 dugbaa l'ọ bũ ọku,
 enwu raphuraphu.”

⁸ A bya lẹ kẹ Nwa iya ọbu; Nchileke asũ:

“Ya sũru ngu nggũbe Nchileke:
 Ọ bũ ẹge ị bũ eze nta-a
 bẹ ịi-bũru iya gbururu
 jeye lẹ tutu yoyo.
 Ii-dobe ẹka ngu ndo;
 l'achi ẹke ị bũ eze.

⁹ Iphe vudo nhamũha
 dũ ngu mma.

Iphe ẹ-te vudodu
 nhamũha adũ ngu ashị.
 Ọ bũ iya meru iphe
 Nchileke ono, bũ Nchileke
 ngu ono fọtaru ngu;
 bya akwabẹ ngu ugvu;

mee: ẹhu atso ngu ẹna;
 Mbu ugvu;
 me ẹhu-otso-ẹna ophu
 ka k'ibe ngu phe.”

10 Nchileke abyakwa bya ekua ya “Nnajiufu”; su:

“Le mbulembu kpọoru;
 bu nggube Nnajiufu keru ali;
 kee iphemiphe obule,
 no iya nu.
 Nngu abya egude ẹka ngu kee igwe;
 me iphemiphe obule,
 no iya nu.

11 Iphemiphe obule ono
 e-mekochaa yifukota.
 Obenu le nggubedua
 a-nolee ege i no.
 Iphemiphe obule ono
 e-mekochaa kashihu l'o bu uwe.

12 Teke ono; nggu aphukoo
 ya aphuko; phufu l'o bu
 onye phufuru ukpo.
 A bya agbanwee ya.
 Obenu le nggubedua
 bu onye i bu; be ii-buru;
 buru iya jeye le tutu yoyo.”

13 ?Nanu ojozi-imigwe ophu Nchileke suseru:

“Nodu iya l'eka-utara
 jeye teke ya e-me ndu
 ohogu ngu t'ephe buru
 iphe ii-dzopyabe l'okpa.”

14 Unwu ojozi-imigwe; ?ephe ta tukodu buru
 ndu ojozi, ẹ ta aphudu l'ẹnya, ejegbaaru Nchileke

ozi; bya aburu ndu Nchileke yeru t'ephe bya eyeru ndu oo-mekochaa dzota aka.

2

Ndzota, paru apaa

¹ Oo ya meru iphe ayi yefutaje ehu l'okfu ono, ayi nuru ono; t'ayi ba akponyaa galagala; kpofo. ² O -buru l'ozi ono, unwu ojozi-imigwe zihawaru ono be meru t'a maru l'okfu ono du ire; iphe bu onye kwefuru ikè; jika iya; eshiwa l'ajika ono jee n-nawere, bu iphe gbaru ephe; ³ ? nanu ege ayibedua e-shi nahu ikpe iya; m'o -buru l'e to nwedu iphe ayi guberu eze ndzofuta ono. Ndzofuta ono bu Nnajiufu l'onwiya be vu uzo kfu okfu iya; ndu nuru iya eya l'onu abya ekepyiaru iya ayi aku. ⁴ Nchileke l'onwiya koshikwaruphu l'o bu oswi-okfu teke ono, o gude ike iya meshia iphe-ohubama, dugbaa biribiri; bya eworu iphe-oma, shigbaa l'eka Ume-du-Nso keshikwaaruphu ndu kweru nk'ia ege o du iya mma l'uche te ya kee ya.

Jisosu ekoshi uzo ndzota

⁵ L'e to bukwa unwu ojozi-imigwe be Nchileke meru t'ephe bugbaaru ishi le mgboko ono, e-mekochaa byanu ono, bu iya bu mgboko ono, ayi ekfu okfu iya ono. ⁶ Iphe Nchileke mechiaru be dunua l'o bu iphe e kfuru l'ekwo okfu iya; su: "Nngube Nchileke;

?bu ngunu; be madu bu
ke t'i riye oriri ehu iya.
?Bu ngunu b'o bu
ke t'i letaje iya enya.

7 I meru iya; yọ laa alì l'ẹke
 ụnwu ojozi-imigwe nọ.
 Ọ bụ l'ẹ tọ ladu alì ono
 ọphu baru nwishi.
 Ị kwabẹru iya ugvu;
 bya emee ya;
 yo nweru ẹnya l'ọ bụ
 onye eze.

8 Nggụ abya emee ya;
 yọ dzọpyabekota iphemiphe ọbule,
 i keru ekeke l'ọkpa.”

Keshinu o meru madzu; yọ dzọpyabekota iphemiphe ọbule l'ọkpa; bunu iya bụ l'ẹ to nwedu m'ọ bụ iphe lanu, ọ gufuru. Obenu lẹ nta-a b'ẹ ta phudua ẹge madzu shi buru ishi iphemiphe ọbule. ⁹ Ọ buchia Jisosu bẹ ayi phuru lẹ Nchileke meru: yọ laa alì l'ẹke ụnwu ojozi-imigwe nọ; ọbule ẹ tọ ladu alì ọbu nọ ọdu. Iphe meru iphe ọ laru alì ono aburu ẹge ooshita l'eze-iphe-oma ọphu Nchileke eme; nwuhu l'okfu ẹhu onyemonye ọbule. Ayi phuru iya ẹge Nchileke kwabẹru iya ugvu; bya emee ya; yo nweru ẹnya l'ọ bụ ẹge eemeje onye eze t'ọ nweru ẹnya; okfu l'ọ jeru iphe-ẹhuka; nwuhu. ¹⁰ Iphemiphe ọbule shi l'ẹka Nchileke; yọ buru iya bụ ishi k'iphemiphe ọbule. Yọ buru yẹbedua, bụ Nchileke b'ọ gbaru l'oshi l'iphe-ẹhuka, Jisosu jeru; mee t'iphe gbaru onye ishi, ekoshi ndiphe ụzo ndzofuta dzugbaa ọkè l'ẹhu iya. Ọo ya bụ ẹge Jisosu ono, ekoshije ndiphe ụzo, ya e-shi dzota ẹphe ono e-shikwaphu l'iphe-ẹhuka ono, o jeru ono; mee ndu ha l'igweligwe t'ẹphe buru

ndu kẹ Nchileke; ndu ẹphe ẹ Nchileke a-tuko egbu nwiinwii.

¹¹ L'ọ kwa yẹbedua, bụ Jisọsu emeje tẹ madzụ dūebe mma l'ifu Nchileke. Ndu ono, o meru t'ẹphe dūebe mma ono bẹ ẹphe l'iya tūkokwaru shi ẹ nna lanu ono. Ọo ya meru iphe-iphere ta adujedu iya oku ẹphe unwunna iya. ¹² Ọ sūkwaru:

“Lẹ ya e-me t'unwunna iya
maru nggube Nchileke;
Ya e-vudo l'ẹke ndu
nke ngu dzuru;
tua ngu ẹpha.”

¹³ Yọ sūkwaphu: “Ọo Nchileke bẹ ya e-woru onwiya ye l'ẹka.” Yọ sūkwaphu ọdo: “Ọ kwa iya ndo-ọ nọ l'ẹke-a yele unwegirima ono, Nchileke nuru iya ono.”

¹⁴ Keshinu unwegirima ono bugbaa madzụ, kfu ẹka kfu ọkpa bẹ Jisọsu gbeshileruphu; bya aburu madzụ ẹge ẹphe bụ. Ishi iya aburu k'ọphu oo-shi l'anwuhu ono, ọ nwuhuru ono; mebyia ike kẹ Obutuswe, bụ Sétanu; keshinu ọ bụ Sétanu ono bẹ shihawa butaru ike, anwuhu gude ere ire. ¹⁵ Jisọsu eshi l'anwuhu ono, ọ nwuhuru ono; tọ ẹphe l'ẹgbu; mbụ ndu ono, shi keshinu ẹphe lufutaru eliphe noduta l'ẹphe bụ ohu; okfu l'ẹphe atsụ egvu anwuhu. ¹⁶ Iphe doru ẹnya bụ l'ẹ tọ bụdu unwu ojozi-imigwe b'ọ byaru tẹ ya yeru ẹka. Ọ bụ o-shi-l'eri Ébirihamu pẹ b'ọ byaru tẹ ya yeru ẹka, bụ iya bụ ẹge ẹkwo okfu Nchileke kfu. ¹⁷ Ọo ya meru iphe ọ bụ iphe ruberu iya erube l'ọ byafutaje bya aburu madzụ ẹge unwunna iya bụ l'iphemiphe

obule; k'ophu oo-shi ege ono buru onye ishi ndu achijeru Nchileke eja, bu onye obu-imiko; bukwaruphu onye e gude ire iya eka l'iphemiphe obule, oomeru Nchileke. E shikwanu ege ono te Nchileke guaru ndiphe nvu l'iphe du eji, ephe meru l'o ha. ¹⁸ Yebedua l'onwiya be jewaru iphe-ehuka; yo bukwaru iya phu iphe-adata. Oo ya meru iphe oduje ike yeru ndu iphe-adata byakfutaru nta-a eka.

3

Jisosu kakwa Mosisu

¹ Oo ya bu; unwunna mu, bu ndu Nchileke kukwaruphu t'unu buru ndu nk'iya; unu rijekponua oriri ke Jisusu ono, bu onye ishi-ozu; me onye ishi ndu achijeru Nchileke eja; m'a -bya l'iphe ono, ayi suru l'o bu okpobe okfu ono. ² Le yebedua koshilekwaruphu Nchileke ono, fotaru iya t'o buru onye ishi ndu achijeru Nchileke eja ono le ya bu onye gbaru t'e gude ire iya eka. Yo bukwaruphu ege ono be Mosisu koshikwaruphu Nchileke le ya gbaru t'e gude ire iya eka l'ozu, o jeru ndu Izurelu l'ephe ha; mbu ndu Izurelu, bu ephe bu ndu onu ulo Nchileke. ³ O bu ege ono, aakaje okwabe onye kpuru ulo uguv me l'ulo obu, o kpuru obu bu ege o gbaru t'a ka oja Jisusu ajaja me le Mosisu. ⁴ A makwarua l'e to nwedu ulo, e-ta budu madzu kpuru iya; obenu l'oo Nchileke bu onye mekwanuru iphemiphe obule. ⁵ Mosisu bulekwapu nwozi kpu. O koshiru Nchileke le ya gbaru ke t'e gude ire iya eka l'ozu, o jeru ndu Izurelu l'ephe ha;

mbụ ndu ọnu ụlo Nchileke. Yọ bụru iya koshiru iphe Nchileke mekocharu mee l'ụzo ifu. ⁶ A byakwanu ị Kuráyisutu: yọ bụru iya bụ Nwa, eleta ụlo Nna iya ọnya. Nna iya ono bụ Nchileke. Yo koshikwaphu Nchileke ị ya gbaru t'e gude ire iya ẹka. Yọ bụkwanuru ayịbedua bụ ndu ọnu ụlo iya ọbu; m'ọ -bụkwaru l'ọkpoma shihuru ayi ike; ayi edobe obu l'iphe ono, ayi ele ọnya iya ono.

Nchileke e-me tẹ ndu nk'iya tuta ume

- ⁷ Ume-dụ-Nsọ kfukwaru; sụ:
 “Teke unu nuru olu Nchileke ntanụ ọwaa;
⁸ Unu ba akpọ-chikwa obu ẹge
 ndiche unu phẹ shi
 kpọ-chia ya teke ono,
 ẹphe kwefuru Nchileke ikè
 l'echi-ẹgu ono;
 mbụ teke ono, ẹphe shi
 anọduje adata Nchileke adata ono.
⁹ Ọ bụ l'ẹke ono;
 bẹ ndiche unu phẹ nọdu;
 data iya adata; ngee ya ọkpa l'ishi;
 l'ẹke ẹphe phụkwaru-a
 iphe ya meshiru l'ime ụkporo afa labụ.
¹⁰ Yọ bụru iya meru iphe ndu
 ogbo ono kpatsuru iya iwe.
 Ya asụ nụ: ‘L'ẹphe
 arị-sweje ọriri arị-swe;
 l'ẹphe te ekwedua shia ụzo,
 ya sụru t'ẹphe shia.’
¹¹ Yọ bụru iya bụ l'ẹphe
 akpatsua ya oke
 ẹhu-eghughu.

Ya eribua ya; sù: 'L'èphe ta
abyadù bya abata l'èke
yèle èphe a-nòdu tuta ume.' "

¹² Oo ya bụ; unwunna mu; unu kwabèkwaru onwunu enya t'è b'o nwe onye a-bụ onye èjo òkpoma l'unu; too nwe onye a-bụ onye te ekwetajedu iphe Nchileke ekfu; k'òphu onye ono ta ahadu otso Nchileke ono, bụ Nchileke, nò ndzụ ono. ¹³ Iphe unu a-nòdu emechia bụ t'unu kfushijeru ibe unu okfu ike mbòku-mbòku, e kukpooru "Ntanù" t'èphe haa iphe dù èji; t'è b'o nwe onye iphe dù èji e-duphu; kpò-chia ya obu; t'è b'ò nù olu Nchileke. ¹⁴ L'ayi tükokwa büru ndu kè Kuráiyisutu, bụ ndu èphe lè Kuráiyisutu a-tùko gbaru mgba l'iphe kè Kuráiyisutu m'ò - büru l'ayi vudoshikpelephu ike l'iphe ono, ayi shi l'òdungu dobe òkpoma ono jeye l'ikperazu.

¹⁵ Keshinu e deru l'èkwo okfu Nchileke; sù:
"Ntanù owaa; teke unu nüru
olu Nchileke;
Unu ba akpò-chikwa obu
ège ndiche unu phè shi
kpò-chia ya teke ono,
èphe kwefuru iya ikè ono."

¹⁶ ?Bù ndu ole bè nuebetsuaru olu Nchileke; bya ekwefuru iya ikè? ?Tò bühedu ndu ono, Mòsisu dufutaru l'alì Íjiputu ono? ¹⁷ ?Bù ndu ole bè kpatsukpeleruphu Nchileke èhu-eghughu ùkporo afa labù? ?Tò bùdu ndu meru iphe dù èji; meebe; nwùshihukota l'echi-ègu? ¹⁸ ?Bù ndu ole b'o riburu angù l'èphe ta abyadù bya abata l'èke èphe l'iya a-nòdu tuta ume? O bụ ndu ono, è-te kwedu ome iphe o kfuru ono. ¹⁹ Oo

ya b̄unu l'ayi ph̄uwaru l'iphe kparu iphe ẹ to kwedu t'ẹphe bata t'ẹphe l'iya t̄ta ume b̄u l'ẹphe te kwedu; mee ẹge o k̄furu.

4

¹ Ọo ya b̄u lẹ keshinu Nchileke kwewaru ayi ụkwa l'ayi a-bah̄u l'ẹke ayi l'iya a-n̄odu t̄ta ume; b̄unu iya b̄u t'ayi tsuje egvu; kwabẹ ẹnya; t'ẹ b'o nwe onye aa-s̄u l'o metaru iphe a-kpata t'ẹ b'o ru ẹke ono. ² L'ọ kwaphu ẹge ono, ndiche ono, M̄osisu duru ọzo l'echi-ẹgu n̄uru ozi-oma keke Nchileke eme tẹ ya dz̄ota ẹphe ono b̄u ẹge ayībedua n̄uru iya nta-a. Obenu l'ok̄fu ono, ẹphe n̄uru ono te nwedu uru, ọ baru ẹphe. Ishi iya ab̄uru l'ẹphe n̄eberu ụkwa, Nchileke kweru; bya emee l'ẹphe ta n̄udu iya. ³ L'ọ b̄ulekwaphu teke ayi n̄uru ozi Nchileke ono; kweta bẹ ayi a-bah̄u l'ẹke ono, ayi l'iya a-n̄odu t̄ta ume ono. L'o k̄fukwaru kẹ ndu ẹ-te kwedu ome iphe o k̄furu; s̄u:

“Ẹphe kpatsuru iya oke ẹhu-eghughu;

Ya eribua ya; s̄u:

‘L'ẹphe ta abyad̄u bya abah̄u

l'ẹke ẹphe l'iya a-n̄odu t̄ta ume.’ ”

Yo k̄fua ya ẹge ono l'ẹke ozi iya gbe gv̄uhaakwanu l'o metsuaru mḡboko. Ayi maru l'o shi teke ono kwab̄etaru t'a bah̄u l'ẹke ono.

⁴ L'o nwekwaru ẹke o k̄furu k̄fukuta mb̄oku k'ẹsaa l'ẹkwo ok̄fu Nchileke; s̄u: “Yo be lẹ mb̄oku k'ẹsaa; Nchileke at̄ta ume k'iphemiphe ọbule, o keru.” ⁵ Obenu l'o k̄fukwaruphu l'ẹkalanu ono; s̄u: “Ẹphe ta abyad̄u bya abah̄u l'ẹke ẹphe l'iya a-n̄odu t̄ta ume.” ⁶ Keshinu ndu

vuru ụzo nwa ozi-oma le Nchileke eme te ya dzofuta ephe ta bahudu l'eke ono; okfu l'ephe te kwedu; mee ege Nchileke kfuru; bunu iya bu l'uzo nokwadia l'eke ono; k'ophu oo-nwe ndu a-bahu iya nu. ⁷ Oo ya meru iphe Nchileke gbeshikwaru; bya eworu mboku odo dobe, bu iya bu "Ntanu". A bya anokpoo anono; l'abahu ono ruhutsuaru; be Nchileke shi l'onu onye eze ephe ke ndiche; mbu Dévidi; kfu okfu iya l'eke ono, e kfu hawaru ono; su:

"Ntanu owaa; teke unu nuru
olu Nchileke;
Unu ba akpo-chikwa obu."

⁸ L'e to bukwa ali Izurelu phu, Joshuwa du ephe bahu teke ndiche phu be ookfu okfu iya. Ndege o buru le Joshuwa duwa ephe bahu l'eke obu, ephe le Nchileke a-nodu tuta ume obu, Nchileke ekfu okfu iya obu; me Nchileke ta ge ekfuekwa k'odobe mboku odo. ⁹ Oo ya bu l'iphe ono, Nchileke kfuru ono ekoshi le teke ndu nk'ia a-bahu l'eke ono, ephe le Nchileke a-nodu; tuta ume ono abyakwadu abyabya; mbu otuta ume ophu ephe a-tuta ogbodo atuta l'ifu iya. ¹⁰ L'iphe bu onye bahuru l'eke ono, onye le Nchileke a-nodu tuta ume ono be a-tuta ume iphe bu ozi, o shi eje l'o ha; ege Nchileke tutakwaruphu ume le mboku, kwe iya esaa, o ketsuaru mgboko. ¹¹ Oo ya bu; t'ayi kebe ehu bahu l'eke yele ndu nk'ia a-nodu tuta ume ono. T'e b'o nwekwa l'ayi ha onye e-je okwefuru Nchileke ike ege ndu Izurelu kwefuru iya teke ndiche phu; ephe ta bahuhe.

¹² L'okfu Nchileke nokwa ndzu; l'ere ire. O kakwa ogu-mbeke, atsü nkọ ifu labu otsu nkọ.

Ọotsushi nkọ ike; k'ọphu ọosujaje madzụ; sụ-rua mgbaku ọkpụ yẹle ụmi-ọkpụ; mbụ sụ-rutsua ẹke obu madzụ nọ; uche iya anọdu iya. Ọovofutaje iphe madzụ arị arịri jeyekpo l'ẹge madzụ gbaru l'ime obu iya. ¹³ Ọphu to nwe iphe nọ lẹ mgboko, nweru ọphu Nchileke ẹ-ta phudu. Iphemiphe ọbule, nọ lẹ mgboko bẹ gbakọta ọtu; daburu ẹba l'ifu Nchileke. Yọ buru Nchileke ono bu onye ayi vudofutaje l'ifu iya; kọshikota iphe ayi meru.

Jisọsu bu Ọkaribe lẹ ndu ishi, achijeru Nchileke ẹja

¹⁴ Ọo ya bu; unu t'ayi kwata gudeshia iphe ono, ayi sūru l'ọ bu ọkpobe okfu ono ike; kẹ l'ayi nweru ọkaribe onye ishi ndu achijeru Nchileke ẹja; onye tuko igwe l'ọphu swekota; je anọduru l'imigwe l'ẹke Nchileke l'onwiya nọ. Onye ono bu Jisọsu, bu Nwatibe Nchileke. ¹⁵ Eze onye ishi ndu ono, achijeru Nchileke ẹja ono, ayi nweru ono ta bukwa onye ẹ-ta madu ẹke atsụ ayi l'ẹhu; m'o -tee ayi. Onye ayi nweru bu onye iphe-adata, dugbaa iche l'iche byakfutawaru teke ọ nọ lẹ mgboko. Iphe adata byakfutawaru iya ẹge ono, ọobyakfutaje ayi ono; ọphu to me iphe du ẹji. ¹⁶ Ọo ya bu; t'ayi buhaa onwayi ẹka jerua l'ifu aba-eze Nchileke, bu ẹke ọonoje emeru ayi eze-iphe-oma; k'ọphu ọo-phuru ayi imiko; meeru ayi eze-iphe-oma; yeru ayi ẹka mẹ mkpa -byaru ayi.

5

¹ L'iphe bu onye ishi ndu achijeru Nchileke ẹja l'ẹphe ha bukwa madzụ edzukobeje; shi

l'ime onwèphe; fòta iya; woru iya mee onye a-nòdujeru òha l'ifu Nchileke. Iphe èphe afòtaje iya bù ège ee-shi t'ò nuje Nchileke iphe madzù nùru iya; gwojejekwaruphu Nchileke ngweja k'iphe dù èji, èphe meru. ² Yèbedua egudaje obu eguda; etso ndu eshiswe ụzo; okfu l'èphe bù ndu è-ta madù iphe; keshinu yèbedua l'onwiya ahajèkwaruphu meswee teke eenwu iya eye t'o mee iphe dù èji. ³ Keshinu yèbedua bukwapu onye emeswejenu b'ò chifutajenuruphu Nchileke èja k'iphe dù èji, yèbedua l'onwiya meru, bù iya bù ège ono, òochijekwapu èja l'okfu èhu òha ono; mbù ndu meru iphe dù èji.

⁴ Iphe òdo bù: l'è to nwekwa onye egbeshije; fòta onwiya; kwabè onwiya ugvu k'òburu onye ishi ndu achijeru Nchileke èja. Ò bù onye Nchileke l'onwiya fòtaru abùjeru iya, bù iya bù ège ò fòtaru Éronu teke ndiche.

⁵ Ò kwaphu ège ono b'è tò bùdu Kuráýisutu gbeshileruphu; kwabè onwiya ugvu k'ome onwiya onye ishi ndu achijeru Nchileke èja. Iphe meru nù buchia lè Nchileke sùru iya:

“Ò bù nggu bù Nwa iya;
tsube ntanù;
bè ya buakwa Nna ngu.”

⁶ Yò byakwa bya ekfua l'èke òdo; sù:

“Ìi-bùru onye achijeru
Nchileke èja
gbururu jeye lè tutu yoyo,
ège Melikízedeku bù iya.”*

* 5:6 5:6 Egvu 110:4.

7 Teke Jisosu shi buru l'eliphe oᵛaa b'o shi anoᵛuje akwa ekwa akwashi ẹnya-mini; gude ekfu anu Nchileke; l'arọ iya; mbu Nchileke, bu onye bu iya a-du ike dzofuta ayi l'eka anwuhu. Yo kfua nu iya; Nchileke anua olu iya; keshinu ophu o bu onye ewozitaje onwiya ali; kwabe Nchileke ugvu. 8 A makwaru-a l'o bu Nwa Nchileke; obu l'o bu iphe-ehuka, o jekotaru b'o gude muta iphe o bu mbu ome iphe Nchileke suru t'e meje. 9 Yo buru le Jisosu ono tuko-oduru ege Nchileke tuseru medzukota b'o bya aburu onye adzotaje iphe bu ndu eme iphe o kfuru; ephe aburu ndu o dzotaru gbururu jeyewaru; 10 keshinu ophu Nchileke bya afotawa iya; mee ya onye ishi ndu achijeru Nchileke eja gbururu jeye le tutu yoyo; ege Melikizedeku bu iya.†

Onma okwa le k'ola azu

11 O nweru igweligwe iphe ayi gage kfu phota iphe owananu; ole ootsu l'ehu ege ee-shi koru iya unu. Ishi iya aburu l'iphe te edojedu unu ẹnya egwegwa. 12 Obenu l'e -kfudekpoo ya ekfukfu nta-a b'o gbaakwaru k'ophu unu ga buwa ndu ezi ndu odo iphe. Obenu l'unu gbe la azu bya aburu ndu gbaru k'ophu aa-noᵛuje ezi unu iphe gbaru ke t'unu mahawaru iya l'okfu Nchileke. Unu dukwadu l'o bu unwegirima, eeche era. Yo buru unube ndu gbaru ke t'unu buwaru ndu bu ogurennya, eriwa nri. 13 Onye eechekwadu era bukwa nwata. E to kwadua ẹnya; k'ophu oo-ma iphe du eji; me iphe du mma. 14 Obenu le nri bu ke ndu buwa ogurennya;

† 5:10 5:10 Egvu 110:4.

ndu a zúfutawaru ẹphe amawaru iphe; k'ọphu
bụ: ẹphe -lee iphe ẹn्या; ẹphe amaru: ?ọ dụ
mma; ?tọ dụ ẹji?

6

¹ Ọo ya bụ t'ayi haa umere ụnwegirima l'ozí
ono, e ziru ayi lẹ kẹ Kuráýisutu ono; wata ọmu
iphe e-me t'ayi bụru ọguren्या; wofu obu l'ọrí
l'ọo iphe, ayi metaru bẹ Nchileke e-gude dzọo
ayi; ² mbụ iphe dụ l'ọ bụ k'ome baputizimu; kẹ
obyibe madzụ ẹka l'ishi; kẹ l'onyemonye ọbule
e-mekochaa shi l'ọnwu teta; mẹ k'íkpe, Nchileke
e-kpe ndiphe mbọku ikperazu. ³ Unu t'ayi
kwasẹru l'ọmu iphe e-me t'ayi bụru ọguren्या,
ozí ono doru ẹn्या. Ndu ọphunanu bẹ ayi e-
mekochakwaa mee; m'ọ -bụru l'ọ dụ Nchileke
mma t'ayi mee ya.

⁴ ?Nanụ ẹge ee-shi mee onye shi etsohawa
iphoro kẹ Nchileke; nọnyaa; haa ya; t'ọ latak-
wadu azụ? Onye ono bẹ shiwa bụru iphoro kẹ
Nchileke shi edu iya. Yọ bya anatawa iphe-oma,
shi l'ẹka Nchileke; bya ayíru lẹ ndu gba mgba
lẹ Ume-dụ-Nsọ. ⁵ Onye ono machacharu-a l'okfu
Nchileke dụ mma; tẹmanu b'ọ gudekwaphu ẹhu
iya; phụ ẹge ike kẹ mgboko ọphu abyanụ erebe
ire. ⁶ Yọ tuko iphe ono maẹbekotaru; bya
agbakutaru Nchileke azụ. Ẹka ta gakwa iya ẹge
onye ono e-mekwadu taa onwiya ụta; latakwadu
azụ ọdo; byakfuta Nchileke; keshinu ọphu o
lebeziwaru ẹn्या akpọpyabe Nwatibe Nchileke
l'oshi-osweru ọdo; eme iya iphe-iphere l'edzudzu
ọha.

⁷ Alì, amìchataje mini, igwe achijeru iya tekenteke; l'egudejekwa iya phụ eme t'iphe a kuru iya baaru ndu kuru iya nụ uru bẹ Nchileke a-gòkwaru ọnu-ọma nụ. ⁸ Obenu l'alì ọphu bụlephu ẹwu-ogvu yee ọgarama-mbo bẹ efuje iya nụ bẹ bụ mkpọkoro alì. Alì onanu phọduru nwanshi; Nchileke atụ iya ọnu. Ee-mekochaa; yọ bụru ọku a-dzụfu iya.

⁹ Ndu mu yeru obu; ayi ekfukwa-a ẹge-a bụ oswi-okfu; ọbu l'ayi makwaru-a l'unu e-tsoru-a ụzo ọphu ka mma, e-me tẹ Nchileke dzọfuta unu. ¹⁰ Lẹ Nchileke te nwekwa onye oomeje iphe l'ụzo, ẹ-ta bụdu lẹ nhamunha iya. Ẹ tọo zahakwa ozi, unu jeru; tọo zaha ẹge unu gude yehawaru unwunna ẹka; mẹ ọphu unu eyekwaphu nta-a. Iphe ono tuko ekoshi l'unu yeru iya obu. ¹¹ Iphe agụ ayi bụ t'onnyemonye ọbule l'unu ha meje koshi ẹge kẹ Nchileke aphy-be iya l'ẹhu; t'onnyemonye ọbule meje iya ẹge ono jeye l'ikperazu; ẹge iphe unu ele ẹnya iya erua unu ẹka. ¹² Iphe ayi ese bụkwa t'unu ba bụru ndu ẹnyiru. Unu mụtachia umere ndu ono, gude ekwekwe, ẹphe kweru okfu Nchileke; mẹ nshi, ẹphe ata; nata iphe ono, Nchileke kwegbaaru ụkwa iya ono.

Ụkwa kẹ Nchileke kwa kamenu

¹³ Teke ono, Nchileke kweru Ẹbirihamu ụkwa iphe ono bẹ bụkwa onwiya b'o gude riaru iya angụ iya. O gude onwiya ria angụ ono; okfu l'ẹ to nwehedu onye ọdo, kafua ya nshinu, ọo-ga egude ria ya. ¹⁴ Ya ndono; yọ sụ Ẹbirihamu: "Ya a-gọru ngu ọnu-ọma; bya emee t'unwu ngu

kfube oswa ha l'igwe." ¹⁵ E meebe; Ébirihamu ataa nshi; yọ buru iya bu l'ọ taa nshi ono tata iphe-oma ono, Nchileke kweru iya ukwa iya ono. ¹⁶ Onye eri angu bu epha onye ka iya nshinu be oogudeje ria ya; temanu be oobuje: a - guwaru enwa ye l'okfu, ndiphe ekfukpo ekfukfu; k'ego ebuhu. ¹⁷ O kwaphu ege ono be Nchileke shi eme t'o doo epha enya; mbu ndu ono, a-nata iphe ono, o kweru ukwa iya ono: l'e to nwedu le ya agbanwee iphe ya tuberu k'ememe. Yọ buru iya meru iphe o riru angu ye l'ukwa iphe ono, o kweru ono. ¹⁸ Nchileke kweru ayi ukwa iphe; bya eria angu ye iya. Uzo iphe labu ono butua iphe ta agbanwejedu agbanwe; bukwaruphu iphe Nchileke ta byadu bya adzuru ejo-ire ye. Oo ya bu ege obu e-shihu ayi ike; ayibe ndu gbakfutaru iya nu t'o dzoo ayi; t'ayi be eje obo obu ebo ke wo: ?a maru: ?oo-nua ayi iphe ono, ayi ele enya iya ono. ¹⁹ Iphe ono, ayi ele enya iya ono emeje t'obu nguru ayi anguru. Iphe ono, ayi ele enya iya ono wotaru ayi lipyabe l'eke Nchileke no l'onwiya; k'ophu ee-shi ege ono mee: t'ayi bahu l'ime ime eze-ulo iya ono, bu iya bu eke Nchileke l'onwiya no l'imigwe. ²⁰ O bu Jisusu bu onye vuru uzo bahu l'eke ono l'okfu ehu ayi; okfu l'oo ya buwa onye ishi ndu achijeru Nchileke eja. Yọ buru iphe oo-buru ndono gbururu jeye le tutu yoyo, bu iya bu ege Melikizedeku bu iya.*

7

* 6:20 6:20 Egvu 110:4.

Melikízedeku bú eze; búru onye achijeru Nchileke eja

¹ Melikízedeku ono, ayi ekfuru ono shi búru eze ndu Salemu teke ndiche; bya abúru onye achijeru Nchileke eja; mbú Nchileke, bú Ọkaribe-Kakọta-Nú. Teke ono, Ébirihamu phẹ shi ọgu, ẹphe gbushiru ndu eze l'alata ono bẹ Melikízedeku ono jeru iya ndzuta. Yẹle iya edzudalephu; yọ gọru ọnu-ọma nú Ébirihamu.

² Ébirihamu abya eworu iphemiphe ọbule, ọ lútaru l'ọgu; kee ọzo iri; nú iya ọzo lanú. A -kọdekpo ẹpha Melikízedeku bẹ iphe kẹ mbú, ọ bú bú: "Onye eze, doberu ẹka ndoo." Iphe ọdo, ẹpha iya bú bú: "Onye eze ẹhu-agu;" keshinu ọ bú eze ndu Salemu. Iphe Salemu bú abúkwanuru: "Ehu-agu". ³ Melikízedeku te nwedu nne; to nwe nna; to nwe ikfu, o shi eshishi. A bya ele ẹnya; yọ nọduwa. Ẹ ta mọdu iya amumu; tọ nwúhu anwúhu. Ọo ya bú l'ọ dúwa l'ọ bú Nwatibẹ Nchileke; kẹ l'ọ búwa onye achijeru Nchileke eja gbururu jeye lẹ tutu yoyo.

⁴ Unu lewaru ẹge Melikízedeku ono búta-be oke madzú. Ọ búta-be oke madzú k'ọphu o gbe búru yẹbedua bẹ Ébirihamu ono, bú ya bú onyiche ayi ono gbe kee iphe ọ lútaru l'ọgu ọzo iri; woru ọzo lanú nú iya. ⁵ Ọ kwa ndu achijeru Nchileke eja; mbú ndu shi l'awa Lívayi nwẹnkinyi bẹ ekemu Mósisu sọru tẹ ndu Ízurelú kejee iphe ẹphe ọzo iri; woru ọzo lanú nú ẹphe. Yọ búru ẹphe; bẹ ekemu kfuru sù t'ẹphe natajẹ unwunne ẹphe iphe ono; mbú ẹke ẹphe l'ẹphe gbe túkọkwa búru

6 Ọ́nwu Ébiríhamu. 6 Obenu lẹ́ Melikízedeku ta ọ́budu o-shi-l'eri Lívayi. Ébiríhamu ono egbe wolerua iphe o nweru; kee ọ́zo iri; woru ọ́zo lanu nọ́ iya. Melikízedeku abya agọ́ru ọ́nu-ọ́ma nọ́ Ébiríhamu; mbu Ébiríhamu ono, bu onye Nchileke kweshiru ukwa iphe ono. 7 E ta tudu ego ke t'a maru: onye ago ọ́nu-ọ́ma; ?o ka onye ọ́goru iya nshinu to? 8 A -bya l'ehu ndu ono, achijeru Nchileke eja ono; mbu ndu ono, shi l'awa Lívayi ono; unu aphu l'o bu ndu e-mekochaa nwuhu anwuhu be anataje ọ́zo lanu l'uzo iri ono. Teke a byakwanuru l'ehu ke Melikízedeku; unu aphu l'o bu onye ekwo okfu Nchileke kfuwaru l'e to nwuhudu anwuhu be nataru iya nu. 9 E -jeshia ya ekfukfu; a phu le teke ono, Ébiríhamu keru iphe iya ọ́zo iri; nu Melikízedeku ọ́zo lanu ono; be buwa Lívayi ono, unwu iya anataje utu nta-a ono; be shi l'eka Ébiríhamu nukwa iya phu Melikízedeku. 10 A makwaru-a le Lívayi b'e ta mukpoduanu teke ono. Obenu l'o nwa l'ehu ochechoroche iya ono; mbu Ébiríhamu teke ono, Ébiríhamu keru iphe iya ọ́zo iri; nu Melikízedeku ọ́zo lanu ono.

11 O kwa le ndu achijeru Nchileke eja; mbu ndu shi l'awa Lívayi no be Nchileke turu ekemu iya; nu ndu Izurelu. Obenu l'ozi ndu ono, achijeru Nchileke eja ono jeru ta dudu ike mee t'iphe Nchileke tuberu le k'ege ndiphe e-meje bata l'eke ya no medzua ege o tuberu iya. Ndege o -buru l'ozi, ephe jeru duru ike mee iphe ono; me ta ge ejehekwa okfu okfu onye odo, a-chijeru Nchileke eja odo, bu iya

bụ Kuráýisutu. Onye ishi ndu ono, achijeru Nchileke ẹja ono te shikwa l'okpa Éronu, bụ iya bụ l'awa Lívayi. Oo ya bụ l'ẹ te ge ejehedu okfu okfu onye ishi ndu achijeru Nchileke ẹja; mbụ onye ophu dụ l'ọ bụ Melikízedeku.* ¹² Obenu ẹ teke Nchileke gbanwewaru ndu achijeru iya ẹja; bya afọ ndu ọdo, a-chijeru iya ẹja; mbụ ndu yele ndu ophunanu ẹ-ta gbahedu; ọo ya bụ l'ọ gbanwefutaje ekemu phụ, ọ tūhawaru phụ. ¹³ Nnajiufu ayi, bụ Kuráýisutu, bụ iya bụ onye eekfukpo okfu iya-a bẹ shikwa l'ikfu ọdo iche; ophu to nwe onye ikfu ẹphe, jejeru ozi k'ochiru Nchileke ẹja l'anya-ngweja Nchileke. ¹⁴ A makwaru-a l'a mụru iya; yọ buru onye ikfu Júda; to nwe teke Mósísu photajeru Júda teke o kfururu okfu kẹ ndu achijeru Nchileke ẹja.

Onye ọdo, achijeru Nchileke ẹja l'ọ bụ Melikízedeku

¹⁵ L'ozí, ndu achijeru Nchileke ẹja, shi l'eri Lívayi jeru ta dukwa ike mee t'iphe Nchileke tūberu ẹ k'ẹge ndiphe e-meje bata l'ẹke ya nọ medzua ẹge ọ tūberu iya. Oo ya meru; yọ kafua ọdo ẹnya teke ono, onye ọdo ono, achijeru Nchileke ẹja ono lufutaru; bụ iya bụ onye ophu dụ l'ọ bụ Melikízedeku.† ¹⁶ Abubu ophu ọ bụ onye achijeru Nchileke ẹja nk'íya ta bụhekwa nsọ nsọ; mẹ ekemu ekemu, madzụ tūshiru dobe b'o gude buru iya. O kwa ike kẹ ndzụ gbururu jeye ophu ọ nọ b'o gude buru onye achijeru Nchileke ẹja. ¹⁷ L'iphe ono b'e dekwaru

* **7:11** 7:11 Egvu 110:4. † **7:15** 7:15 Egvu 110:4.

l'ekwo okfu Nchileke; sụ: “Ìi-buru onye achijeru Nchileke ẹja gbururu jeye lẹ tutu yoyo, bụ iya bụ ẹge Melikizedeku bụ iya.” ¹⁸ Ekemu phụ, Nchileke tūhawaru phụ bẹ Nchileke nwuchiakwaru; okfu l'ẹ too redu ire; bya aburu mkpọkpo iphe. ¹⁹ Iphe o gude dū ẹge ono bụ l'ekemu Mosisu ono te nwedu onye ọ duru ike mee t'ọ dubebe mma l'ifu Nchileke. Nta-a bẹ ayi elewa ẹnya iphe ka mma. Yọ buru iphe ono, ka mma ono, ayi ele ẹnya iya ono bẹ ayi shiwa ejekfube Nchileke ntse.

²⁰ Iphe ọdo, tso iya nū bụ lẹ Nchileke rikwaruphu angū ye iya. Ndu ọphunanu b'e meru ndu achijeru Nchileke ẹja; k'ori angū ta nọ iya. ²¹ Obenu lẹ Jisọsu bẹ Nchileke meru onye achijeru Nchileke ẹja; bya eribua ya teke ono, ọ suru iya:

“Nnajiufu ribuakwaru iya;
 ọphu ya ta agbanwekwa
 iphe ya tūberu k'ememe.
 Ìi-buru onye achijeru
 Nchileke ẹja jeyewaru.”

²² Yọ buru angū ono, Nchileke riru ono meru Jisọsu; yọ buru onye Nchileke gude koshi l'ogbandzū ọwaa, ya riru angū ye-wa ka akahū iya phū mma.

²³ Iphe ọdo bụ lẹ ndu achijeru Nchileke ẹja, bụ ndu ọphu shi l'eri Lívayi ha igweligwe. Ọobuje onye ọphu a fọtaru; yọ bya ejee ozi k'ọchiru Nchileke ẹja ono jeye; yọ kahū. Onye ọdo abya anọ-chikwaa ya phū; okfu l'anwūhu te ekwejedu t'e jee ozi ono kwasewaruru. ²⁴ Obenu lẹ Jisọsu bụkpelephu onye achijeru Nchileke ẹja bụshia

ya ike; okfu lẹ yẹbedua a-nọwaru gbururu jeye. ²⁵ Yọ buru iphe ono meru iphe ọduje ike dzọo ndu shi iya l'ẹka byakfuta Nchileke; mbụ dzọo ẹphe t'ẹphe nọdu ndzụ gbururu jeye. Iphe ono bẹ ọduje ike mee; okfu lẹ yẹbedua nọwa ndzụ gbururu jeye; l'ekfu anụ Nchileke l'okfu ẹka ẹphe.

²⁶ Ọo ya bụ l'ọo Jisọsu bụ onye ishi ndu achijeru Nchileke ẹja, bụ iya bụ egbe onye achijeru Nchileke ẹja, bụ onye ọphu mkpa iya dọru ayi. Ọ bụ onye dọ iche l'ifu Nchileke. Ụta ta nọdu iya l'ẹhu; to nwe iphe dọ ẹji, o mejeru. Nchileke shi l'ẹke ndu emeje iphe du ẹji nọ; ọfọfuta iya iche; bya ewota iya doghakota iphe bụ igweli l'ọ ha. ²⁷ Ndu ọphunanu, bụ ndu ishi ndu achijeru Nchileke ẹja, bụ ndu shi l'eri Lívayi phụ shi anọduje achị ẹja mbọku-mbọku. Ẹphe shi anọduje achị ẹja ono k'iphe dọ ẹji, ẹphe meru; l'achị-tukwaru iya phụ ọha l'ọphụ. Obenu lẹ Jisọsu bẹ mkpa iya ta dọduru kẹ t'ọ chĩa ẹja k'onwiya l'ọ bụ ẹphebedua. Ọ chiru nk'ia ugbo lanụ; sefu ẹka: ugbo lanụ ono bụ ọphụ o gude onwiya chĩa. ²⁸ Ekemu kẹ Mosisu bukwa madzụ mmakanụ b'ọ sọru t'ẹphe buru ndu ishi, a-chijeru Nchileke ẹja; mbụ madzụ mmakanụ, ahajeru meswee l'onwẹphe. Obenu l'a nọnyaaru; Nchileke abya eria angụ phụ; shi ẹge ono nwuchi ekemu ono; bya afọta Nwa Nchileke; mee ya onye ishi ndu achijeru yẹbe Nchileke ẹja. Yẹbedua, bụ Nwa Nchileke ono bẹ medzuwaru iphemiphe ọbule lẹ k'ẹge ndiphe emeje bata l'ẹke Nchileke nọ ẹge Nchileke tọberu iya. Iphe ono b'o medzuwaru ẹge ọo-dụ gbururu

jeye lẹ tutu yoyo.

8

Jisọsu bu onye ishi ndu achijeru Nchileke ẹja nk'ayi

¹ Iphe bu ishi iphe ono, ayi ekfu ono bu l'ayi nweru egbe onye ishi ndu achijeru Nchileke ẹja ophu, bu iya bu Kuráýisutu; onye ophu no anono l'imigwe l'eka-utara aba-eze Okaribe-Kakota-Nu. ² Yẹbedua eje ozi k'ochiru Nchileke ẹja nk'iya l'ẹke Nchileke no gẹdegede, bu iya bu l'eze-ulo Nchileke ophu no l'imigwe. Ulo onanu ta budu madzu gude ẹka mee ya. O buru Nchileke l'onwiya meru iya.

³ Nchileke fotaru iphe bu ndu ishi ndu achijeru iya ẹja; t'ephe nuje iya iphe ndiphe nuru iya; odo bu t'ephe chijekwaru iya phu ẹja. Oo ya bunu l'o gbaru t'o nweru iphe onye ishi ndu achijeru Nchileke ẹja nk'ayi, bu iya bu Kuráýisutu egudenu chjaru Nchileke ẹja. ⁴ Ndege Kuráýisutu ono no le mgboko-a; me ta g'e kwekpokwaanu t'o buru onye ishi ndu achijeru Nchileke ẹja; keshinu ndu achijeru Nchileke ẹja ke mgboko-a achijeru iya ẹya l'ẹge a turu iya l'ekemu ndu Ju. ⁵ Iphe ephe emeje l'ẹke aachijeru Nchileke ẹja ke mgboko-a bukwa iphe yeru ophu onye ishi ndu ono, achijeru Nchileke ẹja nk'ayi ono eme l'imigwe. Ke mgboko-a bukwa nwonyonyo iya nk'iya l'imigwe. Le teke Mosisu shi eme t'o kpobe ulo-ekwa ono, e shi achijeru Nchileke ẹja ono teke ndiche be Nchileke sukwaru iya: "Nyatakwa; mekota ulo ono t'o dulephu ẹge ono,

ya tūru ngu ọnu iya l'eli ugvu ono.” ⁶ Obenu l'ẹge ọ dū nta-a bẹ Nchileke ziwaru Jisọsu oje ozi kẹ ọchijeru Nchileke ẹja; mbụ ozi ọphu ọkwa iya kẹbe ọswa ka nshinu ma lẹ kẹ ndu ọphunanu, bụlephu ndu achijeru Nchileke ẹja phụ. Ọ kwaphu ẹge ono bẹ ọgba-ndzụ ọphu shi iya l'ẹka, o gude jigbabe Nchileke; mẹ madzụ kẹbe ọswa ka akahụ iya phụ mma; keshinu ọphu o shi l'ọgba-ndzụ ọwaa; kwee ayi ụkwa iphe ka mma ma l'ọphu o shi l'ọphunanu kwee.

⁷ Ndege ọ -bụ l'uta ta nọdu l'ọgba-ndzụ kẹ ọdungu phụ; m'ẹ tọ ge ejekwa iya edocha; k'ọphu oo-je ọgba ndzụ ọdo. ⁸ Obenu lẹ Nchileke taru ndu nk'iya uta teke ndiche ono; sụ ẹphe:

“L'ọ nwekwaru-a teke
aa-nonyaa;

yẹbedua yẹle ndu Ízurelu;
mẹ ikfu Júda agbaa ndzụ
ọphu a-buru k'ọphungu.

⁹ Ono ta aduhedu l'ọ bụ
ndzụ ọphu yẹle ndiche
ẹphe gbaru teke ono,
ya kputaru ẹphe l'ẹka;
kpufuta lẹ Íjiputu ono.
L'e mekochakwaaru;
ẹphe emebyia ndzụ,
ẹphe l'iya gbaru.

Yọ buru iya meru iphe
ya te yeheduru ẹphe ọnu.”

Ono iphe Nnajiufu ekfu ndono.

¹⁰ Nnajiufu asukwaphu:

“Ọwaa bụ ndzụ yẹle ndu
ọnu-ulo Ízurelu a-gba

m'o -rulephu teke ono:
 Ekemu iya bẹ ya a-tūshi;
 ye ẹphe l'egomunggo;
 dee ya ode ẹkwo l'obu ẹphe;
 k'ophu ẹphe a-majeru iphe
 ya suru t'ẹphe mee.
 Ya a-buru Nchileke ẹphe;
 ẹphe aburu ndibe iya.

11 Ẹ to nwehedu onye
 ejekwadu ozi ibe iya;
 m'ọ bụ zilahaa nwunne iya
 t'ọ 'Maru Nnajiufu.'
 Ishi iya aburu l'ẹphe l'ẹphe
 ha; a-tukowa maru iya;
 mbu iphe bu ẹge ẹphe ha:
 nwata l'ogurennya.

12 Ya a-phuru ẹphe imiko
 l'emeswe,
 ẹphe mesweshiru iya;
 To nwehe le ya
 anyatakwadu iphe du eji,
 ẹphe meshiru iya ọdo."

13 Keshinu ophu Nchileke kweshiru ukwa
 iphe ophu du ẹge ono l'ogba-ndzu ophu bu
 k'ophungu; bunu iphe o bu bu le k'odungu
 phu b'o wowaru nwuchi l'o bu iphe kahwaru
 akahu. Tẹmanu be iphe bu iphe kahwaru
 akahu; tsuwa ume te nwekwa ẹge ọo-nọ-bebe;
 yo chihu.

9

¹ Ndzu odungu ono, Nchileke yele ndu nk'iya
 gbaru ono nwekwaru nsọ nsọ, eedoje teke

aabaru Nchileke ẹja; bya enwekwaruphu ọlo, madzụ gude ẹka mee, aanọduje teke aachiru Nchileke ẹja. ² Ọlo ono, aachijeru Nchileke ẹja ono b'e gude ẹkwa mee. L'ọlo ono bẹ eze ime ọlo labu nọ. K'ọdungu b'e kuru Ẹke-dụ-Nsọ. Iphe e shi edobeje l'ime iya bu iphe aatukobejegbaa urọku; teburu; me buredi, duru Nchileke nsọ. ³ A -bya l'ime ọlo ono k'ẹbo: bu iphe e gude tubuta iya bu ẹkwa. Iphe eekuje ẹke onanu bu Ẹke-Kakọta-odu-Nsọ. ⁴ Iphe anoje iya nu bu ẹnya-ngweja insensu. Iphe e gude mee ẹnya-ngweja insensu ono bu mkpọla-ododo. Okpoko Ogbandzụ Nchileke nọkwa iya phụ. E gudekwaphu mkpọla-ododo wukota okpoko ono mgburumgburu. Iphe nọ l'okpoko ono bu ite, a wuru le mkpọla-ododo. Iphe nọ l'ime ite ono aburu mana. Mgboro Ẹronu nọkwa iya phụ; mbu mgboro ono, e gbutaru dobe; yọ wata oru iru; wata ọtsu igu; wata amimi ono. Iphe ọdo, nọfukwaa ya phụ bu ekwekwerekwe mkpuma labu, Nchileke deru ekemu iri ono. ⁵ Iphe nọ l'eli okpoko ono aburu unwu ojozi-imigwe labu, eekuje Cherobimu, ekoshije le Nchileke nọ l'ẹke ono. Ẹphe eworu ẹba ẹphe sakaa; gude gbochita ẹke ono, Nchileke aphujeru ndu nk'iya imiko; gvaru ẹphe nvu l'iphe du ẹji, ẹphe meru ono. O bu l'ẹ to budu nta-a bẹ mu a-bya akolahaaru unu ẹge ẹke ono gbaru nanu nanu.

⁶ Yọ buru ẹke ono, e meru ẹge ono bẹ ndu achijeru Nchileke ẹja abahuje l'ime ime ọlo ke ọdungu ono mbọku-mbọku; je ejee ozi k'ochiru Nchileke ẹja, gbaru ẹphe. ⁷ A bya l'ime ọlo k'ẹbo phụ: bulephu onye ishi ndu achijeru Nchileke

ẹja nwenkinyi iya abahuje iya. Abahu ono, ọobahuje iya ono bukwa ugbo lanu kpuu l'afa. Ophu to byakwa bya abahu iya obu; m'o -gudedu mee, oo-gude chia ẹja ẹhu onwiya; nwefu iphe du ẹji, o meru; mekwaphu mee ophu oo-gude chia ẹja; nwefu iphe du ẹji ophu ndu ke Nchileke meshiru; l'amagu ama. ⁸ Iphe Ume-du-Nso gude iphe ono eme t'o doo ẹnya bu le keshinu ẹke ono, madzu gude ẹka mee, aachijeru Nchileke ẹja ono nokwadia b'e ta ghadua Eke-Kakota-odu-Nso te onyemonye obule bahu. ⁹ Eke ono, aachijeru Nchileke ẹja ono be dukwa ududu etu, ekoshi iphe eme nta-a, bu iya bu l'iphemiphe obule, a nuru Nchileke; me iphe bu ẹja, a chiru iya ta ahadu ke mee t'obu onye abaru Nchileke ẹja haa ya onma ikpe. ¹⁰ Iphemiphe obule ono, e gude abaru Nchileke ẹja ono bukota iphe ke mgboko-a b'e gude eme iya. O tuko buru nsọ nsọ, eedogbaa ala le ke nri; me k'iphe aangụ angungu; mekpo ke nsọ nsọ, no l'osashi iphe e gudegbaa mee k'oba ẹja ono. O tuko bu leruphu nsọ nsọ ke mgboko-a, Nchileke suru t'e tsoje jeye teke ya ekoshi ọzo ophungu, ee-shije abaru iya ẹja.

¹¹ Obenu le nta-a be Kurayisutu byawaru bya aburu onye ishi ndu achijeru Nchileke ẹja; mbu onye ishi ndu achijeru Nchileke ẹja l'uzo ono, ka mma, Nchileke koshiwaru nta-a. Eke o jeru ozi k'ochiru Nchileke ẹja nk'ia kakwa nshinu; bya abukwaruphu ẹke Nchileke ka ogude mee t'iphe ya tberu le k'odzota ndiphe medzua l'ege ya tberu iya. Eke ono ta nodu le mgboko owaa; keshinu e-to bu du ẹke madzu gude ẹka mee. ¹² O kwa ugbo lanu nwenkinyi be Kurayisutu bahuru

lẹ Ẹke-Kakota-odu-Nso ono. Ẹ to gudekwa mee egbu; m'ọ bu k'eswi; bahu; je o chiru Nchileke eja. O kwa mee nk'iya b'o gude je achiaru Nchileke eja l'okfu ehu ayi; shi ege ono gbata ayi l'eka iphe du eji; k'ophu ayi a-buru ndu a toru l'egbu gbururu jeye lẹ tutu yoyo. ¹³ L'odungu be oobuje e -wotawa mee egbu; m'ọ bu mee eswi; m'ọ bu ntu ada-eswi, a kporu oku; woru pheaphee ndu mebyiru nsọ ekemu; yo mee ndu obu; epe adu mma l'ege nsọ, tso ekemu epe gude du. ¹⁴ Keshinu ophu o du ege ono l'oswiya be mee ke Kuráyisutu a-kafukwaaru ore ire. Kuráyisutu ono shi l'eka Ume Nchileke ono, a-no jeyewaru ono woru onwiya chiaru Nchileke eja, e-te nwedu eke ntujo no iya. Mee nk'iya ono a-kafukwaaru osacha obu ayi t'o du mma l'ifu Nchileke; k'ophu ayi a-hakwanu ome iphe Nchileke e-kperu ayi nkfugbu; gbe letachia enya l'ozi Nchileke, bu Nchileke, no ndzu.

¹⁵ Yo buru iphe ono meru iphe o bu Kuráyisutu jigbabekota Nchileke yele madzu l'ogba-ndzu ophungu ono. Oo ya bu ege ndu Nchileke fotaru e-shikwanu l'eka Kuráyisutu; nodu ndzu ophungu ono, Nchileke kweru ukwa iya ono gbururu jeyewaru. Iphe meru iphe epe a-nodu ndzu ophungu bu lẹ Kuráyisutu nwuhuwaru; shi ege ono gbata epe l'iphe du eji, epe meeberu teke ono, ogba-ndzu ke odungu phu, shi l'eka Nchileke phu shi erekwadu ire.

¹⁶ Ukwá, Nchileke kweru tukobe l'ogba-ndzu nk'iya dukwa l'o bu ekpe, e keru ekeke. L'oobujekwa e -kee ekpe be aavojeedukwa iya t'a maru: onye keru ekpe obu; ?o nwuhuwaru;

17 tẹmanu yo nweru ẹge ee-me iphe iya ọbu. L'ekpe, madzụ keru te evujekwa ire teke onye keru iya nụ nọkwadua ndzụ. Teke ooreje ire kwa mę onye ọbu nwuhulephu. 18 Ọo ya meru iphe ọ bụ mee b'e gude mee ọgba-ndzụ ọdungu phụ; yo relahaa ire. 19 Iphe ọdungu bụ lẹ Mosisu kfuru ndu Ízurelu iphe bụ nsọ nsọ, nọtsua l'ekemu ono l'ọ ha. Yo gbeshi; bya ewota oshi isopu yęe ẹji aturu; ẹji aturu ono bę eemeje yoo ke uswuswe. Yọ bya ewota iya tşee lẹ mee unwu eswi nshii; mę mee egbu; bya atşekwaa ya phụ lẹ mini; bya egude iya phęgbaru l'ekwo, e deru ekemu ono; bya ephegbakwaru iya phụ iphe bụ ndu ono l'ephe ha. 20 Teke ọo-nọdu ephe iya; yo kfushi: "Ọwaa bụ mee, ekoshi lẹ ndzụ, unu lẹ Nchileke gbaru vuwa ire; mbụ ọgba-ndzụ ono, o shi koshi unu iphe unu e-me; ẹge yębedua e-mekwanu iphe ya kfuru ono." 21 Yọ bụkwaruphu ẹge ono bę Mosisu meru; bya eworu mee ono phęgbaru l'ulo ono, e gude ekwa mee ono, bụ iya bụ ulo ono, aanọduje chiaru Nchileke ẹja ono; bya ephegbakwaru iya phụ l'iphe bụ iphe, e gude abaru Nchileke ẹja. 22 Mbụ; e -tsodekpoo ya ẹge ekemu dụ; b'ọ phọdukwaru nwanshị mę iphemiphe ọbule abụkotaru mee bę eegudeje mee ya t'ọ safu; dụ mma. Tọ bụhenu l'ee-gbe gvaru madzụ nvu l'iphe dụ ẹji, o meru; m'ọ bụdu l'o nweru iphe e gburu; lọkaa mee ya.

Eja Kuráyisutu enwefuje iphe dụ ẹji, e meru

23 Ọ bụ iphe gbaru l'ememe t'e shi l'uzo nsọ nsọ ono; lọka-odu mee ono; mee tẹ iphemiphe ọbule ono, tuko bụru iphe yeru ọkpobe iya ọphu

nọ l'imigwe phụ; bụru iphe gbufuru egbufu; dụ mma. Obenu l'okpuberu iphe ono, nọ l'imigwe ono bụ iphe gbaru iya nụ bụ ngweja ophu tuko kakota ophu eegbuje anụ; gude chia mma. ²⁴ L'ẹke Kuráýisutu bahuru ta bukwa ẹke aachijeru Nchileke eja, ophu bụ madzụ gude ẹka mee ya; mbụ ẹke yeru okpobe iya phụ. Ẹke o bahuru bụ l'imigwe gededede, bụ iya bụ ẹke o nọ l'ifu Nchileke; ekfu okfu ẹhu ayi. ²⁵ Onye ishi ndu achijeru Nchileke eja kẹ ndu Ju egudeje mee, ẹ-ta bụdu kẹ yebe onye ishi ono; bahụ lẹ Ẹke-Kakota-odu-Nsọ afa l'afa; je ochi eja. Obenu lẹ Kuráýisutu ta bahudu l'ẹke ono iphe ka ugbo lanụ. O bụ ugbo lanụ nwenkinyi b'ọ bahuru iya; woru onwiya chia eja. ²⁶ Ndege o jeshiaru ochi eja ono: o -chitsua ya t'ọ chikwazi iya odo; m'o jee iphe-ẹhuka k'o-jetsua-o-jekwazi; keshinu teke Nchileke keru mgboko. Obekwanu l'iphe o gbe mee bụ l'ọ gbadeleruphu lẹ mgboko abyawa agvugvu; tẹ Nchileke kpee ndiphe ikpe; yọ bya bya ejee iphe-ẹhuka ono ugbo lanụ; sefu ẹka; woru onwiya chiaru ayi eja; nwuhu; shi ẹge ono safu iphe dụ eji, ayi meru l'ọ ha. ²⁷ Iphe nọru onyemonye obule bụ l'onyemonye obule nwuhufutaje anwuhu ugbo lanụ. O -nwuhutsulephu; iphe odo, e-tso iya nụ bụ lẹ Nchileke e-kpe iya ikpe. ²⁸ O kwaphu ẹge ono bẹ Kuráýisutu gude onwiya chia eja ugbo lanụ nwenkinyi; nwuhu; k'ophu oo-shi ẹge ono; nwefu iphe dụ eji, igwe oha meru. Oo-mekochakwaa bya k'ugbo ẹbo; obenu l'ọ -byalephu k'ugbo ẹbo ono b'ẹ tọ byatuhekwaru iya iphe dụ eji; iphe oobyia buakwa t'ọ bya dzota

ndu eche iya nù.

10

¹ Ekemu ndu Ju bú iphe dù l'ò bú nwinyokinyoki nwonyonyo iphe dù mma, Nchileke tüberu, ya e-me l'uzo ifu. Ekemu ono te ekoshibebejekwa iphemiphe obule ono, Nchileke e-mekochaa mee l'uzo ifu ono. Ndu etso iphe a tūru l'ekemu ono abyaję bya achiaru Nchileke eja afa l'afa. Epe -byatsua; epe abyakwaphu odo ochi egbe eja lanu ono. Oo ya kparu iphe ekemu ono ta abyadu bya a-du ike mee te ndu etso iya nu buru ndu doberu eka ndoo l'ifu Nchileke. ?Oo-me imagha mee ya; l'eke epe gbe abyaję ochi eja obu afa l'afa: a -chitsua; a chikwazikwa iya phu odo? ² Ndege ndu ono, achijeru Nchileke eja ono shi-wa l'ochi eja ono; gbuchafu ugbo lanu; buwaru ndu doberu eka ndoo l'ifu Nchileke; me epe ahawa owa-phe obu iphe du eji, epe meru; hakwanua ochi eja anu Nchileke. ³ Obenu l'iphe emeje nu bu l'oo eja ono, epe anoduje achi ono emeje t'epe nyata iphe du eji epe afa l'afa. ⁴ Le mee eswi; me mee egbu ta ahakwa k'osafu iphe du eji, madzu emeebe.

⁵ Yo buru iphe ono kparu iphe teke Kuráýisutu abya le mgboko b'ò suru Nchileke:

“E tii ledu enya t'e wota iphe
gbua; gude chiaru ngu eja;
m'ò bu t'e gworu iphe nu ngu.
Iphe i gbe mechia aburu
l'i meru iya; ya aburu madzu;
nweru ehu ophu ya e-wota

gude chīaru ngu eja.

⁶ Ngweja-ukfuru;
mẹ ngweja iphe-eji;
te nwekwa ophu ī choru.

⁷ Tọ dụ iya bu; ya asu:
'Oo yebedua ndo-o; Nchileke:
ya byawaru te ya mee
iphe bu uche-obu ngu:
te ya mee ege e deru nk'iya l'ekwo ekemu.'

⁸ Iphe ono, o kfuru ono b'o vuru uzo; su: "Iphe e wotaru; gude chīaru ngu eja; eja, a chīru; nu ngu; jeye le ngweja-ukfuru; me ngweja iphe-eji; iphe ono l'o ha te nweđu ophu iile enya iya; to nwe ophu jiru ngu epho." O bu iphe o kfuru ndono; e guderu l'ēja ono l'o ha be aachikpelekwaphu l'ege a turu ekemu; su t'a chije iya. ⁹ Yo kfuebe ege ono; bya asu: "Oo yebedua ndo-o; Nchileke; ya byawaru te ya mee iphe bu uche-obu ngu." Tọ dụ iya bu; Nchileke abya atuko akahu ngweja dochi; bya eworu eja ke Kuráyisutu dochia enya iya. ¹⁰ O bu okfu le Jisusu Kuráyisutu meru iphe ono, bu uche-obu Nchileke t'o mee ono; meru iphe ayi bu ndu o safuru iphe dụ eji, ayi meshiru. Iphe dụ eji, ayi meshiru b'o safuru teke ono, o gude onwiya chia eja ugbo lanu; sefu eka ono.

¹¹ A -bya l'ogba-ndzu k'odungu be iphe bu onye achiru Nchileke eja evudoje; eje ozi k'ochiru Nchileke eja mboku-mboku. Egbe eja, o chihawaru; yo chikwatakwa iya phu odo tekenteke. Obenu l'egbe eja ono ta abyadu bya adu ike safu iphe dụ eji. ¹² Kuráyisutu abyakwanu

bya achi nk'iya; chia ugbo eja lanu; safu iphe du eji. Onanu aburu eja, o chiru, a-noduwaru ere ire jeyewaru. Yo chiebe iya; bya eje anozita l'eka-utara Nchileke. ¹³ Yo buru eke ono be o-nodu jeye teke Nchileke e-woru ndu ohogu ke yebe Kurayisutu mee t'ephe buru iphe oodzopyabe l'okpa. ¹⁴ To du iya bu; yo shi ege ono buru ugbo eja lanu b'o chiru; gude iya mee te ndu o safuru iphe du eji, ephe meshiru buru ndu doberu eka ndoo l'ifu Nchileke gbururu jeye le tutu yoyo.

¹⁵ Le Ume-du-Nso koshikwaruphu ayi l'iphe ono bu oswi-okfu; okfu l'o vuru uzo; su:

¹⁶ "Owaa bu ndzu, Nnajiufu

kfuru le yele unwu Izurelu a-gba;

me mboku ono -rulephu,

bu ege Nnajiufu kfuru.

Ekemu iya be ya a-tu;

yetsua ephe l'okpoma.

Ya e-de iya ege eedeje

ekwo l'egomunggo ephe."

¹⁷ Yo gbeshikwa odo bya asu: "Le ya ta abyahedu bya anyatakwadu iphe du eji, ephe meshikotaru; me ejo iphe, ephe mekotaru." ¹⁸ Oo ya bu le teke o bu le Nchileke guwaru ndu nk'iya nvu l'iphemiphe obule ono; be mkpa ochi eja k'osafu iphe du eji ta duhekwa.

Okpirita Nchileke ntse

¹⁹ Nta-a; unwunna mu; keshinu ophu ayi buhawaru onwayi eka k'oshi le mee, Jisusu bahu le Eke-Kakota-odu-Nso ono; ²⁰ b'o gudeekwa ugwehu iya; guhaaru ayi uzo ophungu ophu

anụ ndzu. Yò buru ugwehu iya ono nọ ọnodu ẹkwa ono, eegechitaje ẹke eeshije abahụ Ẹke-Kakọta-ọdu-Nsọ. Ẹkwa ono meeberu; lajahụ ẹbo; shi ẹge ono ekoshi l'anwuhu, Kuráyisutu nwuhuru guhawaru ayi ụzo t'ayi bahụ l'ẹke ono, Nchileke nọ ono. ²¹ Ayi nweru onye ishi ndu achijeru Nchileke ẹja, bụ iya bẹ eze-ulo Nchileke nọ l'ẹka. Keshinu ayi nweru onye ishi ndu achijeru Nchileke ẹja, dū ẹge ono; onye bụ iya bẹ ndu ọnu ụlo Nchileke nọ l'ẹka; ²² bụnu iya bụ t'ayi gude obu ayi l'ọ ha; mbụ obu, kweshikpooru ike lẹ Nchileke a-nata ayi; gude kpịrita iya ntse-ntse. Lẹ Jisọsu gudeekwa mee ya; phebbaru l'obu ayi; k'ọphu bụ l'ẹ to nwehedu m'ọ bụ akpuru iphe lanu, dū ẹji, a-nọdu awajekwadu ayi ọkpoma. Ayi dụakwa l'ọ bụ ndu o gude mini, doru edodo saa. ²³ Unu t'ayi kwata gudeshia iphe ono, ayi sụru l'ayi ele ẹnya iya ono ike; t'ayi ba atụhe onwayi nwa-nkata-ẹweji l'iphe ono, ayi ele ẹnya iya ono; lẹ Nchileke yẹbedua, kweru ayi ụkwa iphe ono evudoshijekwa ike l'iphe o kfulu. ²⁴ Unu t'ayi yejeru ẹhu l'iphe a-duru ibe ayi lẹ mma; k'ọphu ayi e-meje ndu ọdo t'ephe yejeru ibe ẹphe obu; mẹ t'ephe meje iphe dū mma. ²⁵ Unu t'ayi ba ahakwa odzukobeje l'ẹkalanu ono, ayi edzukobeje ono. Unu t'ayi ba ahakwa iya; wata agbala. L'ọ nwekwaru ndu, hawaru mee ya; yọ dūwa l'ọ bụ ozi; nọduru ẹphe; l'ẹphe a-nọdu agbalaje tekenteke. Unu t'ayi be emeshi ẹge ono. Iphe ayi e-gbe emeje bụ t'ayi meje tẹ ọkpoma shihu ibe ayi ike; ketekete ẹge-a unu phuru lẹ Eswe kẹ Nnajiufu dụakwa ntse-a.

²⁶ Mbụ: nta-a, ayi mawaru iphe bụ ọkpobe

okfu ono; bya elebezi ẹnya eme iphe dụ ẹji b'ẹ to nwehekwa ngweja, asafukwadu iphe dụ ẹji, ayi meru. ²⁷ O gbe b́uru iphe lanu, nonu nwenkinyi bu ọtsu-egvu k'iphe e-me nu, bu iya bu egvu ikpe Nchileke. L'ọ kwa ẹjo ọku ono, eme ẹnari ono be bu ọku ọphu e-mebyishi iphe bu ndu kwefuru Nchileke ike. ²⁸ Ọobujekwa madzụ -dakaa ekemu Mosisu; a -duwa ẹbo; m'ọ bu ẹto gbaa ya ekebe; a nma iya ikpe; woru onye ọbu megbua. Ẹ ta phujekwaru iya imiko. ²⁹ Ọ -b́uru l'eemegbuje onye dakaru ekemu Mosisu emegbu; unu lewaru ẹge ọo-dụ onye kporu Nwatibe Nchileke ẹbo-ẹbo l'afu. Onye ono be Nchileke a-kafukwaaru ọgwa ọchi; mbu onye wotaru mee Nwa Nchileke; mee iphe mmakanu; mbu mee ono, Kuráyisutu gude mee te ọgba-ndzụ Nchileke yele madzụ vuru ire ono; l'ẹke ọ bukwapu mee ono b'o gude sachaa onye ọbu; t'onye ọbu b́uru onye dụebe mma l'ifu Nchileke. Onye kporu Nwa Nchileke ẹbo-ẹbo l'afu buakwa Ume-dụ-Nsọ, emejeru ayi eze-iphe-oma be ọogwo l'ẹja. Egbe onye ono be Nchileke a-kakpokwaaru ọgwa ọchi. ³⁰ L'ayi makwaru onye ono, kfulu; sụ: "L'ọo yebedua e-melata; b́uru iya be ọkfu ọgwo nọ l'ẹka." Yọ sukwapu ọdo: "L'ọo yebe Nnajiufu e-kpe ndibe iya ikpe." ³¹ Mbu l'onye Nchileke ono, nọ ndzụ ono nmaru ikpe buakwa ẹjo iphe byaru iya.

³² Unu nyatakwa ẹge o shi duru unu le mbulembu teke ono, unu phuru iphoro ke Nchileke ono. Unu nyatakwa ẹge unu gude jee iphe-ẹhuka, ha igweligwe; unu atalee nshi; unu te kwe t'iphe ono kapyabe unu ẹka. ³³ O nwet-

sukwaaru teke e shi achije unu ochi; mee unu iphe-iphere l'edzudzu oha; nweru teke shi abuje: a -kpadu unubedua egbe ehu ono; unu asu l'unu noduwa ohuma; l'unu le ndu ophu aakpa iya atuko jee iphe-ehuka obu. ³⁴ Unu aphu-tabejeru ndu, no le mkporo l'o -bu unu no le mkporo obu. Aanakotaje unu iphe unu nweru le mgboko; unu egudelee ehu-otso-ena; tagbua ya le nshi; okfu l'unu maru l'unu nweruru iphe odo, kafua mma, bu iphe ophu a-noduwaru gbururu jeye. ³⁵ Oo ya bu; t'okpoma shihulekwaphu unu ike ege o shihuru iya unu. T'obu ba agbakwa unu ebo; le Nchileke e-mekochakwaa kfu unu ugwo iya l'iphe ha nshinu. ³⁶ Iphe mkpa iya duru unu bu ota-nshi; k'ophu unu e-mejekwanu iphe bu uche-obu Nchileke; shi ege ono nata iphe o kweru ukwa iya. ³⁷ L'o dukwaa l'o bu ekwo okfu Nchileke, suru:

“L'o phoduakwarua nwanshi;
 onye ono,
 byafutaje nu ono abya.
 E too kpohekwa ukfu.

³⁸ L'onye woru onwiya ye
 Nchileke l'eka;
 shi ege ono dobe eka ndoo a-dzukwaru.
 O -buru l'onye ono
 tsulalaru azu; b'e too dukwa
 yebe Nchileke mma l'obu.”

³⁹ Obekwanu l'ayi ta budu ndu ophu tsularu azu, a-la l'iyi. Ayi bu chia ndu ophu kwetaru nu; woru onwayi ye iya l'eka; ege ee-shi t'o dzoo ayi; t'ayi nweru ndu gbururu jeye.

11

Iphe okweta ke Nchileke bu

¹ Iphe ono, bu ekweta ono bu ogudeshi eka ike l'iphe madzu ele enya iya; bya amakporu l'iphe ono, e ta phudu l'enya ono nophu l'oswiya.

² Ndiche ayi phe bu l'ephe kwetaru ke Nchileke; meru iphe ephe bu ndu Nchileke suru l'ephe meru ohuma.

³ O bu ekweta, ayi kwetaru ke Nchileke; meru iphe o doru ayi enya le mgboko-a bu okfu, Nchileke kfuru l'onu b'o gude mee ya; mbu l'iphemiphe obule-a, enya elegbaa-wa bu okfu, Nchileke kfuru l'onu b'o shi; mbu okfu, e kfuru l'onu, e ta phudu l'enya.

⁴ O bu ekweta, Ebelu kwetaru ke Nchileke; meru iphe o chiru Nchileke eja, ka ke Kenu, bu nwunne iya. Yo buru ekweta ono meru iphe Nchileke nataru eja ono, o chiru iya ono; gude koshi l'o bu onye doberu eka ndoo l'ifu yebe Nchileke. Yo buru ekweta, Ebelu kwetaru ke Nchileke; meru iphe iphe o meru ezilee ayi iphe byeye nta-a; l'o nwuhutsuaru.

⁵ O bu ekweta, Inoku kwetaru ke Nchileke; meru iphe o nokwaduru ndzu; Nchileke abya ewolita iya t'e b'o nwuhushi anwuhu le phuu; to nwehe onye phuru iya nu; kele Nchileke woliwaru iya. Ekwo okfu Nchileke suru le Inoku shi emeje iphe du Nchileke mma l'obu; b'o wolideru iya woba l'imigwe. ⁶ L'e to nwekwa onye a-du ike ome iphe du Nchileke mma l'obu; m'o -budu l'onye obu kwetaoduru le Nchileke no. L'onye akpirita Nchileke ntse vufutajeodukwa

uzo kweta lẹ Nchileke nọ; kwetakwaphu l'oobuje ndu achọ iya nụ nggo.

⁷ Ọ bụ ekweta, Nónwa kwetaru kẹ Nchileke; meru iphe ọ ngaberu nchị teke Nchileke nmaru iya ọkwa iphe e-mekochaa mee nụ, bụ iya bụ iphe ẹ to gudedua ẹnya iya phụ. Yo mee iphe Nchileke kfulu: kụa eze ụgbo, Nchileke gude dzọọ yẹ ndibe iya ndzụ. Yo shi ẹge ono koshi madzụ l'umere ndiphe dụ ẹji. Yọ buru ekweta ono meru iphe Nchileke gụru iya l'onye doberu ẹka ndoo; kele Nchileke aguje ndu kwetaru nk'iya lẹ ndu doberu ẹka ndoo.

⁸ Ọ bụ ekweta, Ébirihamu kwetaru kẹ Nchileke; meru iphe o meru ẹge Nchileke kfulu teke o kuru iya. Yọ tųgbua; lufu jeshia alị, Nchileke kweru iya ụkwa lẹ ya a-nụ iya t'ọ buru nk'iya. Ébirihamu shi l'alị iya tųgbua ije; l'ẹ b'ọ ma ẹke ooje. ⁹ Ọ bụ ekweta, o kwetaru kẹ Nchileke; meru iphe o je eburu l'alị ono, Nchileke kweru iya ụkwa iya ono. Yo buru iya l'ọ bụ onye laru iya alala. Ụlo, yẹ Áyizaku; mẹ Jékọpu shi ebuje abuleruphu ụlo, e gude ẹkwa mee. Ẹphebedua bẹ Nchileke kwekwaruphu ụkwa iphe lanụ ono, o kweru Ébirihamu ono. ¹⁰ L'iphe Ébirihamu ele ẹnya iya bụ eze obodo ono, a tọru ntọ-l'alị iya k'ophungu, oo-nwewaruru gbururu jeye ono; mbụ eze obodo ophu bụ Nchileke gude ẹka iya tịa ẹge ọo-du; bya egude ẹka iya kpua ya l'onwiya.

¹¹ Yọ buru ekweta, Séra l'onwiya kwetaru kẹ Nchileke; mekwaruphu; yọ buru yẹbe nwanyi, nọru; tọ tsụbua ime jeye yọ nọghaa teke gbaru

iya l'òtsuta ime bẹ Nchileke meleru-a; yọ tsùta ime. Ishi iya abùru l'o doberu Nchileke l'onye evudoshije ike l'iphe o kweru ùkwa iya. ¹² Yọ bùru iphe ono meru iphe ọ bụ nwoke lanù ono; mbù Ébirihamu mekocharu buru nna, muru igwe ọha; lẹ nwoke ọphu shi kahùwa akahù; mbù dùwa l'ọ bụ onye nwùhuru anwùhu. Ùnwu iya emeebe; bya ajaa àjàjà; l'ọ bụ mkpọ-kpodo, nọ l'igwe; mbù l'ọ bụ eveve mgbogidi ẹnìmu; bùru 'agùta agùta.

¹³ Iphe bụ ndu ono, a gùshikotaru ono gudesi ẹka ike l'iphe ono, Nchileke kweru ẹphe ùkwa iya ono jeye ẹphe anwùshihu. Iphe ono, Nchileke kwegbaaru ẹphe ùkwa iya ono te rukwa ẹphe ẹka l'ẹphe nọkwadu ndzù. Obenu l'ẹphe phùkotaru iphe ono, nọkwadu ote-ẹnnya ono; bya etee ẹswa iya. Ẹphe ekweta l'ẹphe l'ẹphe bụ mbyamùmbya; bya abùru ndu kpafùtaru uri lẹ mgboko. ¹⁴ Ndu ekfu ẹge ono bụ iphe ẹphe ekoshi bụ l'ẹphe achọkwadu alì, e-mekochaa buru nk'ẹphe achọcho. ¹⁵ Ndege obu obodo phù, ẹphe shi lufuta phù shi aduje ẹphe; mẹ ẹphe achọlahaa ụzo; laphushia azù. ¹⁶ Obenu l'ẹke ẹnnya dù ẹphe bụ l'obodo ọphu ka mma, bụ iya bụ obodo ọphu nọ l'imigwe. Yọ bùru iya meru iphe-iphere te emedu Nchileke l'ẹphe kuru iya Nchileke ẹphe; okfu l'ọ kwakọberu ẹphe obodo kẹ imigwe.

¹⁷ Ọ bụ ekweta, Ébirihamu kwetaru kẹ Nchileke; meru iphe o dutaru nwatibe iya; mbù Áyizaku t'o je egbua; gude chọaru Nchileke ẹja teke ono, Nchileke mejeru tẹ ya data iya

ono. Yò b́uru Ébiríham ono, Nchileke kweru ́kwa lẹ ya a-nụ iya nwata ono; bẹ gbeshiru nụ duta nwa nanụ iya ono jeshia ọchiru Nchileke ẹja. ¹⁸ Nchileke kweru Ébiríhamu ́kwa: “L'ọo Áyizaku bẹ oo-shi mụshia ́nwu nwanwanwaranwa.” Yò b́uru nwa lanụ ono; mbụ Áyizaku bẹ Ébiríhamu dutaru; gude jeshia ọchiru Nchileke ẹja. ¹⁹ Iphe Ébiríhamu phuru abụleruphu lẹ Nchileke a-dụa ike mee Áyizaku t'o shi l'ọnwu teta nọdu ndzụ; b́unu iya b́u l'e -kfude iya ekfukfu bẹ Áyizaku d́wa l'ọ b́u onye shi l'ọnwu teta nọdu ndzụ; keshinu o mekocharu; tsoru Ébiríhamu lata azu.

²⁰ Ọ b́u ekweta, Áyizaku kwetaru kẹ Nchileke; meru iphe ọ gọru ọnu-ọma nụ Jékọpu yẹe Íso; bya ekwetakwaphu l'ọnu ono, ya gọru ono e-rekota ẹge ya gọru iya.

²¹ Ọ b́u ekweta, Jékọpu kwetaru kẹ Nchileke; meru iphe ọ gọru ọnu-ọma nụ ́nwu Jófẹfu l'ẹhu l'ẹhu; b'ọ nwuhuderu. Yo vudo evudo; woru mgboro iya tsube l'alị; fozita l'eli iya; baaru Nchileke ẹja l'ọogo ọnu-ọma ono.

²² Ọ b́u ekweta, Jófẹfu kwetaru kẹ Nchileke; meru iphe tẹmanu yọ nwuhude b'o kfuru lẹ ndu Ízurelu e-mekochaa shi l'alị Íjiputu wufu; lashia alị, Nchileke kweru ẹphe ́kwa iya. Yò bya ekoshikwaphu ẹphe ẹge ẹphe e-me ọkpu iya teke ẹphe wufuderu.

²³ Ọ b́u ekweta, nne lẹ nna Mósísu kwetaru kẹ Nchileke; meru iphe ẹphe domiru Mósísu ọnwa ẹto l'a mụtsuaru iya; okfu l'ẹphe leri iya ẹnya;

yọ búru nwata, dụ ugvu; ẹphe ta tsụ egvu omebyi ekemu, eze ndu Íjiputu tǔru sù t'e gbujee iphe bú nwata nwoke, onye Ju mǔru k'ọphungu.

²⁴ Ọ bú ekweta, Mósísu kwetaru kẹ Nchileke; meru iphe teke o vufutaru b'ọ jikaru t'ẹ b'e kujehẹ iya nwatibẹ nwa-nwanyi eze ndu Íjiputu.

²⁵ Ọ hataru otsoru unwu Nchileke; jee iphe-ẹhuka; ma l'ọnodu l'ẹhu-ọtso-ẹna; eme iphe dụ ẹji; mbụ ẹhu-ọtso-ẹna ọphu ẹ-te nwedu ẹke ọono-bebe. ²⁶ Iphe ọ kwẹru ẹka bú l'ọ -búru l'aakpa iya ẹhu l'okfu ẹka Onye Ndzọta ono, Nchileke kweru ụkwa iya l'oo-bya lẹ mgboko ono b'ọ ka iya mma ma lẹ ya nwekotaru ẹku, nọ l'alí Íjiputu mgburumgburu. Ishi iya abúru l'ẹnya dụ iya l'obunggo ọphu nọ l'ụzo ifu.

²⁷ Yọ búru ekweta, Mósísu kwetaru kẹ Nchileke; meru iphe ọ haru Íjiputu; tǔgbua; tọ tsụ egvu l'ẹhu e-ghu eze ndu Íjiputu ono eghughu. Yo tsua ẹka l'ọkpoma; nọ-kirishia; l'à sùrù l'ọ gude ẹnya iya phụ Nchileke; l'ẹ-ba bú lẹ Nchileke bú onye eegudeje ẹnya phụ. ²⁸ Ọ bú ekweta, Mósísu kwetaru kẹ Nchileke; meru iphe o gbuberu ishi kẹ Aji Esweta teke ono, ọ sùru ndu Ízurelu l'ẹphe ha t'ẹphe woru mee nwatǔru phebbaa l'iphe bú ọnu ibo ẹphe; tẹ onye mgbugbu-madzụ, byaru ogbushi ndu bú ọkpara ndu Íjiputu ba dụ ọkpara kẹ ndu Ízurelu, oo-gbu.

²⁹ Ọ bú ekweta, ndu Ízurelu kwetaru kẹ Nchileke; meru iphe ẹphe wulahuru l'echi Eze Ẽnyimu Uswe; eje l'ogbodali l'ọ bú onye eje l'echi esu-uzo. Ndu Íjiputu ejeshia esweswe; mini

erigbushikota ẹphe.

³⁰ Ọ bụ ekweta, ndu Ízurelu kwetaru kẹ Nchileke; meru iphe ọpho-mkpuma, e gude kpụ-
phee Jériko mgburumgburu daru ẹ ndu Ízurelu
jephetsuaru iya mgburumgburu abali ẹsaa. ³¹ Ọ
bụ ekweta, nwanyi ọkpara ono; mbụ Réhabu
kwetaru kẹ Nchileke; meru iphe a haru iya; ta
tukohe yele ndu kwefuru Nchileke ike gbushia;
okfu l'o domiru ndu Ízurelu ono, byaru ngge ẹ
Jériko ono; shi ẹge ono dzoo ẹphe.

³² ? Mu e-le ole agu? ? Bụ teke ole bẹ
mu a-nodu gushiwaru Gídiyonu pẹ; mẹ
Béraku; Sámusinu; Jéfuta; mępo Dévidi pẹ;
Sámuwelu; męwaru ndu nkfuchiru Nchileke? ?
Teke ole bẹ mu a-nodu kọkota akọ ẹge ẹphe
kwetaberu kẹ Nchileke? ³³ Ọ bụ ekweta, ẹphe
kwetaru kẹ Nchileke bẹ meru iphe ẹphe tsoru
mbakeshi ọgu; lukota ẹphe kpamu. Yọ buru
ekweta ono bẹ ẹphe shi egudeje eme ndu ali
ẹphe t'ẹphe meje iphe vudo nhamunha; gude iya
phua ẹge Nchileke shi meeru ẹphe iphe o kweru
ẹphe ukwa iya; gude iya mekwaaphu agu, gage
egbu ẹphe; to nwe ọphu duru ike kúhaa onu
akúhaa; ³⁴ bya egude iya dzọ-nyia ọku, ada ririri;
bya egude iya nahu ndu gude ogu-mbeke achi
ẹphe k'egbugbu. Ẹphe shi buru ndu ike ta nodu;
e metsukwanua; ẹphe abya aburu ndu ike no.
Ẹphe shi buru ọ-karia-ẹka l'ọgu; k'ọphu ẹphe
shi achije ndu ọhodo nanu nanu. ³⁵ Ụnwanyi,
kwetaru nu phuru ndibe ẹphe, nwushihuru nu
l'ẹphe shi l'onwu tetagbaa nodu ndzu.

O nweru ndu ọphu e meru l'iwe jeye ẹphe

anwushihu. Ẹphe ahata; l'o be kẹ t'ẹphe jika Nchileke ẹge ee-shi t'a haa ẹphe t'ẹphe gbalaa; t'e gbuchikwaa ẹphe t'ẹphe nwushihu. Iphe kparu iya nū bụ l'ẹphe ele ẹnya lẹ Nchileke e-mekochaa mee t'ẹphe teta nọdu ndzụ ophu ka mma. ³⁶ O nweru ndu ophu a jaru ewena; chia ẹphe iphe; nweru ndu ophu a tūru mkpakọbe; chita ẹphe je eye lẹ mkpọro. ³⁷ O nweru ndu ophu a tugbushiru lẹ mkpuma; nweru ndu ophu e kwobuhuru ẹbo; nweru ndu ophu e gude mma gbushia. Ẹphe eshi etsojeru aghaphelephu; iphe ẹphe shi eyeje l'ẹhu aburu akpọ egbu. Ẹphe kparu ukpa; a kpaa ẹphe ẹhu; mee ẹphe; ẹphe ejee iphe-ẹhuka. ³⁸ Mgboko dūta-be ẹji k'ọphu bụ l'ẹ tọ gbadu k'ọphu ẹphe a-nọkota iya. Ẹphe shi anọduje aghaphe l'echi-ẹgu, ẹ te budu ebubu; mẹ l'ẹke eze ugvu nọgbaa. Ẹphe eshi ebuje l'ọgba mẹ l'enu.

³⁹ Ndu-wa tūkokwa buru ndu ẹkwo okfu Nchileke ekoshi l'ẹphe bụ ndu Nchileke suru l'ẹphe shi eme osuma. Yọ buru ekweta, ẹphe kwetaru kẹ Nchileke ono kparu iya. Ẹphe anọ-o jeye; iphe ono, Nchileke kweru ukwa iya ono te rukwa ẹphe ẹka. ⁴⁰ Iphe meru iphe o dū ẹge ono bụ lẹ Nchileke achiru ayi idzu, ophu ka mma. Iphe o tūberu bụ l'oo-wota ayi l'ẹphe tūgbabe; mee ayi ugbo lanu t'ayi tūko buru ndu dzuru oke; dūebe mma l'ifu iya.

12

Nchileke ehe ayi l'ọ bụ nna

¹ A bya l'èhu k'ayìbedua; iphe bụ ndu ono tũkookwaru nọ-pheru ayi mgburumgburu l'ọ bụ onye urukpu nọ-pheru mgburumgburu. Èphe tũko eme t'ayi maru iphe okweta kẹ Nchileke ono bụ. Ọo ya bụ t'ayi hakwaa iphe bụ iphe alọla ayi azụ; haa iphe bụ iphe dụ eji ono, ẹ-te kwedu ayi ọha ẹka ono. T'ayi byibe ẹka l'ọkpoma; maa ọso-amama ono, nọru ayi ono; ² tũbekpelephu Jisọsu ẹnya; agba ọso ono; l'ọo ya bụ onye ivuzọ ọso k'okweta kẹ Nchileke ono; bũru iya e-me t'ayi gbaa ya; gbafũ iya l'ishi. Yẹbedua mawaru ẹhu-ọtso-ẹna, Nchileke doberu iya. Yọ bũru iphe ono meru iphe o kwetaru; jee iphe-ẹhuka jeye; a kpọpyabe iya l'oshi-osweru; yọ nwũhu; ọphu iphe-iphere, e shi l'egbe anwũhu ono, ọ nwũhuru ono mee ya te nwe iphe ọ bụ iya. Nta-a b'o jewaru je adũgaru l'ẹka-utara aba-eze Nchileke.

³ Unu rijekponua kẹ Jisọsu ono, tũko iphe-ẹhuka ono jeebe ono. Ọ tũko ẹjo ememe, ndu eme iphe dụ eji meru iya; mẹ ẹjo okfu, ẹphe kfuru iya dagbukota lẹ nkịchi. Unu nyatajẹ iya; k'ọphu ike ta agvũdu unu. Ọdo bụ t'unu ba sũ l'unu ta agbahẹdu ọso ono. ⁴ L'ọgu, unu l'iphe dụ eji alũ bẹ unu ta alurukwaa; k'ọphu unu a-lũ iya jeye; e gbushia unu egbushi. ⁵ ?Unu zahawaru okfu ono, Nchileke kfuru, o gude mee t'obu shihu unu ike l'unu bụ unwu iya ono tọo? Ọ sũru:

“Nwa mu; ba arikwa l'ahũhũ,
 Nnajiufu ahũ ngu te nwedu iphe ọ bụ;
 ọphu i gudekwa l'ọ baru
 ngu mba; wata ọla azụ-azụ.

⁶ L'ọ kwa onye Nnajiufu yeru
 obu bẹ ọohũje ahũhũ;

bùru onye ọ nataru t'ọ bùru nwa iya;
bẹ oochije ẹchachi.”

⁷ Ọo ya bụ; teke Nchileke àhù unu àhùhù; unu tajekwa nshi; l'ahùhù ono bukwa àhùhù, nna ahùje nwa iya t'ọ maru iphe. Ọ kwa àhùhù, Nchileke ahù unu ndono; okfu l'unu bụ unwu iya. ?Unu phujeru nwa, nna iya ẹ-ta hùdu àhùhù t'ọ maru iphe? ⁸ Teke ọ bụ lẹ Nchileke ta ahùdu unu àhùhù t'unu maru iphe ẹge ọohù unwu iya ọdo; ọo ya bụ l'unu ta abudu okpobe unwu iya. Unu bụ ndu a gbataru l'okpara. ⁹ Ọobuje teke ndu bụ nna ayi kẹ mgboko-a echi ayi ẹchachi; ayi eyeleru-a ẹphe ugwu. ?Buchia Nna ayi ọphu bu l'imigwe bẹ ayi ta akafuduaru oworu onwayi nụ; shi ẹge ono nweru ndzụ. ¹⁰ Ndu bụ nna ayi kẹ mgboko-a ahùta-bejelephu ayi àhùhù nwa afa olemole ẹge dụ ẹphe mma. Obenu lẹ Nchileke ahùje ayi àhùhù; k'ọphu ọo-duru ayi lẹ mma; t'ayi dubebe mma l'ọ bụ yẹbedua. ¹¹ Ọobuje teke aahù ayi àhùhù t'ayi maru iphe; yọo hụ ayi ọku teke ono; ẹhu ta atsọ ayi ẹna. Ndu, a hùrù àhùhù; hùta; ẹphe amaru iphe; emetsujekwaa bùru ndu eme ọhuma; bukwaruphu ndu ẹhu emetsujee dụ agu.

Ọnma ọkwa

¹² Ọo ya bụ; unu vudoshia ike l'ekwekwe ono, unu kweru kẹ Nchileke ono. L'ọ dụakwa l'ẹka tsushiru unu ume; dụwa l'okpa afụ unu kwèkwèkwè. Unu lọchia ẹka ono, tsushiru unu ume ono ałochi; unu emee okpa ono, afụ unu kwèkwèkwè ono t'o shihutsua unu ike. ¹³ Unu tuko iphe bụ iphe a-nochi unu ụzo; wofu; k'ọphu

unu tee medu tẹ ndu ọphunanu, dụwa l'ọ bụ ndu ọkpa nwụshihuru anwụshihu phụ paru okfu Nchileke ono haa. L'ọ kwa l'ụzo, vudo nhamunha bẹ ọkpa, nwụhuru anwụhu e-teta.

¹⁴ Unu kebe ẹhu meje iphe e-me t'unu l'onnyemonye ọbule nọdu lẹ nchi ọdu-ndo; bụru ndu dụ nsọ; l'onye ta adudu nsọ ta abyakwa bya aphụ Nchileke. ¹⁵ Iphe unu a-kwaberu ẹnya bụ t'ẹ b'o nwe onye a-gbakutaru eze-iphe-oma kẹ Nchileke azu. Unu eletakwaphu ẹnya t'ẹ b'o nwe onye a-bya adu l'ọ bụ ọgbaragba-oshi, atsọ ile; kpofuta l'ẹke unu nọ; bya aghaswashilaha unu ẹhu; shi ẹge ono merushia igwe ọha. ¹⁶ Unu letakwa ẹnya t'ẹ b'o nwe onye a-nọdu eme kẹ nwanyi; too nwe onye a-nọduje elegbu iphe kẹ Nchileke l'ẹnya l'ọ bụ Íso. Lẹ Íso gudekwa oji tototo kẹ nri; kweta tẹ nwunne iya bụwaruru ọkpara, yẹbedua, bụ Íso shi bụru; l'okfu tẹ ya ria ugbo nri lanu. ¹⁷ L'unu manaru l'e metsuaru; yọ chọlahaa tẹ nna iya gọoru iya ọnu-oma. A sụ iya l'ọ gbawaru iya l'azu; okfu l'ẹ to nwehedu ẹge oo-shikwadu mekwaa iphe o mebyihawaru emebi. Yo gude ẹnya-mini; chọo ọnu-oma nna iya ono; to nwehe.

¹⁸ Eke unu byaru ta bụkwa Ugvu Sáyinayi, unu e-byi ẹka l'ọ bụ ndu Ízurelu teke ono, Nchileke turu ẹphe ekemu ono. Ẹ tọ bụkwa l'ọku ono, enwu raphuraphu ono bẹ unu byaru; tọ bụ l'ọchi ono; m'ọ bụ ẹke ono gbahuru tsabalangu ono. Ẹ tọ bụkwa l'eze pherephere ono; ¹⁹ tọ bụ ọda ụpyoku ono; m'ọ bụ olu ono, daru l'ọ bụ egbe-igwe ono bẹ unu nuru. Lẹ teke ndu Ízurelu nuru

olu ono bẹ ẹphe rọkwaru t'ẹ b'o kfuhekwa ọdo. ²⁰ Ishi iya aburu l'ekemu, Nchileke turu bẹ ẹphe suru l'ọ kariru ẹphe ẹka; bu iya bu ekemu ono, suru: "Lẹ to nwedu m'o -ruhuru; ọ buru anu bẹ ẹhu iya chiru l'eze ugvu ono; t'a tugbu ya lẹ mkpuma." ²¹ Iphe ẹphe phuru l'ẹke ono dunuka biribiri; k'ọphu Mosisu suru: "Lẹ ya atsushikwa egvu ike; k'ọphu ẹhu anma iya anmanma." Ẹ tọ bukwa egbe ẹke ono bẹ unu byaru.

²² Ẹke unu gbe bya bukwa Ugvu Záyọnu; mbu obodo kẹ Nchileke; Nchileke ọphu nọ ndzu. Ẹke unu byaru bukwa obodo ọphu ẹpha iya bu Jerúsalemu ọphu nọ l'imigwe; unu byakfutaru unwu ojozi-imigwe ọphu bu 'aguta-aguta. ²³ Ẹke unu byaru bukwa ẹke unwu Nchileke, o dobekotaru l'ọnodu ndu bu ọkpara dzukoberu; ẹhu atso ẹphe ẹna; mbu ndu e deru ẹpha ẹphe l'ẹkwo l'imigwe. Unu byakfutakwaru Nchileke; onye bu iya e-kpe onyemonye ọbule ikpe. Ndu unu byakfutaru bu ndu nwuhuhawaru nu, doberu ẹka ndoo; ndu Nchileke meru t'ẹphe dufubebe mma l'ifu iya. ²⁴ Onye unu byakfutaru bukwa Jisusu; onye bu iya jigbabe Nchileke yele madzu l'ogba-ndzu ọphungu ono. Unu byakfutakwaphu mee ono, ọ lọkaru l'oshi-osweru ono, bu mee ọphu ekoshi iphe ọphu ka kẹ Ébẹlu mma.

²⁵ Ọo ya bu t'unu kwabenuphu ẹnya t'unu ba ajika ọngaberu onye ono, ekfu okfu ono nchi. Lẹ keshinu ndiche ayi phe ta nahudu ikpe Nchileke; okfu l'ẹphe ta ngadu nchi l'iphe ono, a loru ẹphe ẹka lẹ nchi lẹ mgboko-a ono bẹ ayibedua ta anahukwa; m'ọ -buru l'ayi jikaru onye ono, nọ l'imigwe, alọ ayi ẹka lẹ nchi ono. ²⁶ Teke ndiche

ono be olu iya nmakotaru eliphe mgburumgburu jijiji; obenu le nta-a b'o kfuwaru: "L'oo ugbo lanu be ya a-nmafua eliphe jijiji; nmakota nmaa imigwe." ²⁷ Nchileke suru: "L'o bufua ugbo lanu." Ugbo lanu ono, o kfuru ono koshiru l'iphe ono, o meeberu ono be oo-mekota t'o nmaa jijiji; yo wofu iya. Oo ya bu k'ophu ophu ta nmadu jijiji a-nodu.

²⁸ Oo ya bu t'ayi keleje Nchileke ekele; okfu l'o nuwaru ayi eke o bu eze; mbu eke te nwedu iphe ha k'onma iya jijiji. T'ayi keleje iya; gude odu-biribiri iya; wozita onwayi ali; kwabeje iya ugvu; ²⁹ le Nchileke ayi bukwa oku, te nwedu iphe odzu-phodoje.

13

Ome iphe du Nchileke mma

¹ Unu ba ahakwa oyeru ibe unu obu ono, bu iya bu obu ono, unu gude okfu l'unu shiwa l'eka Kurayisutu buru unwunna; yeru ibe unu ono. ² Unu ba azahakwa okwajeru ndu byaru abyabya ebyee okpobe akwakwa. L'o nwekwaru ndu gudetsu-a l'ephe akwaru ndu byaru abyabya ebyee; kwaru unwu ojozi-imigwe ebyee; ephe ta ma. ³ Unu nyatajeka ndu mkporo; t'o dujekwa unu l'o bu unu no le mkporo obu. Unu nyatajeka ndu eje iphe-ehuka; t'o dujekwa unu l'o bu unu eje iphe-ehuka obu.

⁴ Te ndu alu alulu mejekwa alulu, ephe; k'ophu oo-buru iphe e-te nwedu onye a-nodu amaru iya ejo eka. Te nwoke yele nyee ya ba adukwa onye ophu e-ri ogori; shi ege ono

merushia onwẹphe. Lẹ nwoke, eme kẹ nwanyi; m'ọ bụ nwanyi, eme kẹ nwoke; mẹ ndu eri ogori bẹ Nchileke a-nmakwa ikpe.

⁵ Unu be eyenukakwa ẹnya l'okpoga. T'iphe unu nweru dzujukwaaru unu. Lẹ Nchileke kfuakwaru iya l'onwiya; sụ: “Lẹ ya ta ahakwa ngu ẹka; ya te ebuhaa ngu ẹka.” ⁶ Ọo ya bụ; unu t'ayi kfushijenu okfu-a ike; kfuje iya l'ẹ-ba atsụ egvu:

“L'ọ kwa Nnajiufu bụ
 onye eyeru mu ẹka;
 to nwe lẹ mu atsua egvu.
 ?Bụ onye e-me mu ngunu.”

⁷ Unu nyatajẹ ndu ono, vu ụzo koshi unu ụzo ono; bụ iya bụ ndu ono, ziru unu ozi-oma Nchileke ono. T'egomunggo rukwaa unu ali; t'unu nyata ẹge ẹphe shi anọduje eme teke ẹphe nọ ndzụ; jeye ẹphe anwuhu. T'ekwekwe, unu kweru kẹ Nchileke dukwa l'ọ bụ nk'ẹphe. ⁸ Jisọsu Kuráyisutu bụ onye ono, ọ bụ ono b'ọ bụ ụnyaphua; ya b'ọ bụ ntanụ; ya bụ ọo-bụ gbururu jeye lẹ tutu yoyo. Ẹ ọo gbanwejedu agbanwe.

⁹ Unu be ekwekwa t'iphe eezi ezizi, dutsua iche iche shi uswe bya akpọbyia unu ụzo. Ọ dū mma t'ayi gude eze-iphe-oma, Nchileke eme; t'obu shihu ayi ike. Ome nsọ nsọ nri, eeri eriri te emekwa t'obu shihu ayi ike; l'ẹ to nwebukwaa onye tsojeru iya ẹge ono, o yejeru ẹka.

¹⁰ Ayi nweru ẹnya-ngweja Nchileke; mbụ ọphu ndu achikwaduru Nchileke ẹja l'ụlo, e gude ẹkwa mee; ta hadu kẹ ria iphe shi iya nụ.

¹¹ Onye, bụ onye ishi ndu achijeru Nchileke ẹja; egudeje mee anụ bahu lẹ Eke-Kakọta-odu-Nsọ

t'ephe gude iya chia aja; nwefu iphe du eji. Obenu l'anu ono, e gbuwaru egbugbu ono; be eewotaje lufu l'odu ndu Izurelu; je akpoa ya oku.

¹² O bu iphe ono meru iphe Jisusu nokwaruphu l'azu mkpukpu; jee iphe-ehuka; nwuhu; ege eeshi t'o gude mee ya; safu iphe du eji, ndiphe meru. ¹³ Oo ya bu; unu t'ayi jekfube iya l'azu mkpukpu; t'a tuko ayi l'iya mee iphe-iphere.

¹⁴ Le to nwekwa obodo, ayi nweru le mgbokoa, bu obodo ophu a-noduwaru jeye. O buchia iphe meru nu bu l'ayi achọ obodo ophu abya nu.

¹⁵ Oo ya bu; t'e b'o nwekwa teke ayi a-haje otushi Nchileke epha. Te otushi epha ono buru aja, ayi shi Jisusu l'eka achi anu iya. O bu epha ono, ayi etushi iya ono a-bu iphe shi ayi l'onu, ekoshi l'ayi buwa ndu nk'iya. ¹⁶ Unu ba ahakwa ome iphe du mma; unu taa ha ogudeje iphe unu nweru eyeru ibe unu aka; l'o kwa egbe ngweja ono bu ophu du Nchileke mma.

¹⁷ Unu meje iphe ndu ishi unu suru t'unu mee; m'o -ruhuru; ootsu unu l'ehu ememe. L'o kwa ndu ono, bu ndu ishi ono be anoduje eche ndzu unu; keshinu epe e-mekochaa vudo l'ifu Nchileke; doo ege epe jetaberu ozi eh unu. Teke unu emewa iphe epe suru t'unu meje be epe e-gude eh-otso-ena; jee ozi epe ono. Odumeka be epe a-nodukwa atsu ude l'ime obu epe; eme iya. Ono te nwekwa uru, unu erita iya.

¹⁸ Unu kfujekwa nuru ayi Nchileke. Ophu ayi makporu bu l'obu ta awadu ayi awawa; to nwe teke e to buleduphu t'ayi mee iphe du mma l'iphemiphe obule, ayi eme be ayi eshibeje ite

iya. ¹⁹ Iphe mu aròshikpoo unu ike; ùnwunna mu; bụ t'unu kfuje nụ Nchileke; tẹ Nchileke kwe tẹ mu byakfuta unu ẹgwegwa.

Okfu anụ Nchileke

²⁰ Tẹ Nchileke ono, bụ iya emeje t'ẹhu dụ agu ono; yekwaru unu ẹka. Oo ya meru tẹ Nnajiufu ayi Jisọsu Kuráýisutu shi l'ọnwu teta nọdu ndzụ; bụ iya bụ onye shi l'anwuhu, ọ nwuhuru bụru eze onye eche ayi ẹge eecheje aturu. Yọ bụru mee, ọ lọkaru teke ono, ọ nwuhuru ono b'o gude mee ụkwa ono, Nchileke kweru tukobe l'ọgbandzụ yẹle madzụ ono t'o vuru ire jeyewaru. ²¹ Tẹ Nchileke ono mee t'unu nweru iphemiphe ọbule, bụ iphe dụ mma; t'unu meje uche-obu iya. Tẹ Nchileke shikwaphu l'ẹka Jisọsu Kuráýisutu mee iphe dụ iya mma l'obu ayi. Tẹ ajaja bụru kẹ Kuráýisutu gbururu jeye lẹ tutu yoyo! Ono kwa ẹge ọ dụ.

Okfu, eegude akpochi iya ishi

²² Ọ kwa aroro bẹ mu arọ unu; ùnwunna mu; sụ t'unu takwaa nshi; nụ a ozi-wa; l'ẹkwo-wa, mu deru unu-wa ta dukwa ogologo. Oo ya bụ t'o mee t'obu shia unu ike. ²³ Iphe mu eme t'unu maru bụ lẹ nwanna ayi Tímoti, e shi tuchia lẹ mkpọro b'a haakwaru. Ọ -byanụ ẹgwegwa bẹ mu l'iya a-yiru-a teke mu a-bya unu agbaphe.

²⁴ Unu kelekotaru mu iphe bụ ndu ishi unu; mẹ iphe bụ ndu kẹ Nchileke. Ùnwunna ayi ndu Ítali ekelekwaphu unu.

²⁵ Tẹ Nchileke meeru unu eze-iphe-oma l'unu ha.

Bayiburu Ikwo
Ikwo: Bayiburu Ikwo Bible

copyright © 2014 Wycliffe Bible Translators, Inc.

Language: (Ikwo)

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 21 Feb 2024 from source
files dated 29 Jan 2022

3867ef4e-3384-5ab4-a937-63476bb8a7bb